

萬有文庫

第一集一千種

王雲五主編

宋詩別裁

張景星等選



商務印書館發行

萬有文庫

第一集一千種

總編纂者

王雲五

商務印書館發行


上海圖書館藏書



A541 212 0004 0694B

宋詩別裁

張景星等選



國學基本叢書

序

宋詩百一鈔者。雲間張部曹二銘暨其同志姚徵士述齋王孝廉補堂相與撰定之書也。鈔名百一。蓋謂嘗鼎一臠。窺豹一斑。亦可見宋詩宗派云爾。以予觀之。則一代源流正變已具。其諸美善之會歸鑒裁之至當者歟。夫論詩必宗唐是也。然雲霞傳天。異彩同爛。花萼發樹。殊色互妍。江醴陵云。楚謠漢風。既非一骨。魏製晉造。固亦二體。言古今辭章之變化也。變化者。前人後人所以日出不窮。以罄天地之藏。而洩靈府之祕。否則銖銖稱之。寸寸度之。循聲躡影。僞種流傳。而不能相逐於變化無窮之域。惡足闡唐賢闡奧哉。第波瀾雖富。句律不可疎。鍛煉雖精。情性不可遠。比興深婉。何貴乎走石揚沙。宮商協暢。何貴乎腐木濕鼓。斯則上下三百餘年。詩家金科玉尺。端有在焉。而是書取舍。要爲實獲我心。杜兩宋末流之弊。踵三唐最勝之業。其在茲乎。其在茲乎。辱承誣諉作序。爲揭其大指於簡首。時乾隆辛巳且月。玉篴傅玉露拜題。

宋詩別裁目錄

卷一 五言古

王琪一首
江休復一首
文同一首
孔平仲二首
黃庭堅三首
晁沖之一首
劉弇一首
葉夢得二首
張九成一首
范成大二首
楊萬里三首
張栻一首
謝翱一首

劉敞一首
韓維一首
蘇軾九首
賀鑄三首
秦觀一首
張耒二首
倪濤一首
陳與義四首
劉子翬三首
陸游四首
朱子七首
姜夔一首

宋詩別裁目錄

卷二 七言古

歐陽修 四首

梅堯臣 一首

司馬光 一首

王安石 一首

蘇軾 十二首

孔武仲 一首

賀鑄 一首

郭祥正 一首

黃庭堅 四首

晁補之 五首

晁沖之 一首

卷三 七言古

張耒 四首

李昭玘 一首

韓駒 一首

李彌遜 一首

周紫芝 五首

陳與義 一首

朱松 一首

劉子翬 一首

王銍 一首

范成大 三首

陸游 十首

楊萬里 六首

王十朋 一首

陳造 一首

劉過 一首

敖陶孫 一首

鄒登龍一首

謝 翱六首

卷四 五言律

寇 準一首

王禹偁二首

韓 琦一首

余 靖一首

蘇舜欽二首

劉 敞九首

司馬光四首

程伯子一首

蘇 軾四首

黃庭堅一首

陳師道三首

唐 庚一首

孫 覲一首

文天祥一首

張 詠一首

宋 祁五首

文彥博二首

歐陽修五首

梅堯臣五首

周 子一首

王安石五首

文 同一首

賀 鑄三首

張 耒一首

李昭玘一首

汪 藻四首

周 孚二首

宋詩別裁 目錄

周紫芝一首

王庭珪一首

呂本中一首

陳與義七首

曹勛一首

劉子翬一首

范成大三首

陸游三首

楊萬里八首

朱子二首

張栻一首

王十朋二首

陳造一首

趙師秀三首

翁卷一首

徐照一首

徐璣三首

高翥一首

嚴粲一首

姚鏞一首

方岳一首

張道洽一首

周弼一首

陳鑒之一首

林景熙一首

卷五 七言律

李昉一首

徐鉉二首

張詠一首

王禹偁六首

王 操 一首
錢惟演 一首
穆 修 一首
宋 祁 五首
夏 竦 一首
文彥博 一首
歐陽修 六首
梅堯臣 三首
曾 鞏 三首
王 珪 三首
王安國 一首
鄭 俠 一首
王 令 一首
蘇 軾 二十首
孔武仲 一首
賀 鑄 五首

楊 億 四首
丁 謂 一首
林 逋 三首
晏 殊 二首
韓 琦 二首
趙 抃 一首
蘇舜欽 一首
蔡 襄 一首
司馬光 二首
王安石 九首
韓 維 一首
沈 遘 一首
程 伯子 一首
蘇 轍 三首
孔平仲 三首
楊 蟠 一首

宋詩別裁目錄

卷六七言律

黃庭堅四首

晁補之一首

陳師道四首

謝逸一首

韓駒二首

汪藻一首

周紫芝一首

王琮一首

呂本中一首

曾幾一首

王銍一首

范成大五首

楊萬里九首

呂祖謙二首

呂定二首

秦觀三首

張耒五首

彭汝礪一首

蘇過一首

張元幹一首

李彌遜一首

周孚二首

王庭珪三首

陳與義十首

朱松二首

尤袤四首

陸游十四首

朱子八首

王十朋一首

華岳一首

陳造一首

岳珂一首

杜範一首

張道洽二首

樂雷發一首

卷七五言排律

王禹偁一首

錢惟演一首

宋祁三首

歐陽修九首

曾鞏一首

王安石二首

黃庭堅二首

陳與義二首

卷八五言絕 七言絕

范仲淹二首

樓鑰一首

劉仙倫一首

方岳一首

陳起一首

柴望一首

楊億五首

石延年一首

范仲淹一首

劉攽一首

王珪一首

蘇軾五首

秦觀二首

陸游三首

歐陽修六首

宋詩別裁目錄

劉敞一首

王安石九首

蘇轍一首

秦觀一首

崔鶻一首

曹勛一首

陸游五首

張孝祥二首

葉茵一首

利登二首

朱繼芳一首

家鉉翁一首

王禹偁二首

林逋一首

石介一首

蘇舜欽二首

多

司馬光一首

文同四首

郭祥正三首

傅察二首

陳與義二首

劉子翬一首

朱子一首

葛天民一首

嚴粲一首

張道洽一首

俞桂一首

羅公升二首

魏野一首

宋祁一首

歐陽修七首

劉攽一首

司馬光一首

蘇軾十三首

郭祥正一首

晁補之一首

張耒一首

鄒浩一首

李彌遜一首

程俱一首

朱棹二首

范成大五首

楊萬里二首

張栻三首

周文璞一首

黃大受一首

謝枋得一首

王安石十三首

米芾一首

秦觀三首

晁沖之二首

陳師道一首

韓駒一首

陳與義二首

朱松二首

周必大一首

陸游十五首

朱子二首

汪莘一首

戴復古一首

武衍一首

宋詩別裁

卷一

五言古

秋日白鷺亭

王琪

白鷺敞西軒。棟宇窮爽塏。千峯若聯環。翠色不可解。是時天宇曠。六幕無纖靄。金斗熨秋江。素練橫衣帶。乾坤清且歛。氣象朝昏改。蘆花作雪風。飛舞來滄海。九霄汀鷺起。萬里檣烏快。月上三山頭。烏沒橫塘外。蒼茫州渚寒。銀錯星斗大。開樽屏絲竹。披襟向簫籟。余生本江湖。偃蹇欣所會。清興雖自發。苦嗜亦吾累。魚龍憑夜濤。四面忽滂湃。安得犀燈然。煌煌發水怪。

睡起

劉敞

日午吏稍休。池上逍遙眠。水木澹相映。庭戶清無喧。時有山中禽。來鳴高樹巔。微風拂衽過。會意成翛然。有生滯形役。萬物安靜便。媿無淮陽績。高臥亦終年。

車駟岡閱馬

江休復

牧馬散近垆。閱視乘高秋。駟岡似沙苑。堆阜帶川洲。坡陁故梁城。縈薄西南陬。連棚映林樾。星羅倚層邱。回風吹陣雲。奔騰欵來游。野性脫羈羈。飲齧遂所求。腹幹頗肥張。鬱怒何彪休。羣毆驟麋鹿。逸勢凌蛟虬。軍戎選輕捷。和鑾御調柔。毛物有千名。衆美歸驂騑。梁王愁思臺。佛刹居上頭。竭來一憑眺。遺墟莽悠悠。

信陵骨已朽。巖穴誰見收。當時英豪輩。事逐東波流。置酒臨風軒。聊以紓煩憂。

送孔先生還山

韓維

先生樂道者。於世淡無欲。高風自絕人。正行不違俗。竭來城闕游。不受塵事觸。日久望林壑。駕言反幽築。家臨滢水陽。路轉春山曲。東風吹百花。紅紫滿巖谷。蠶桑事未起。農里得徵逐。社酒濁易求。山蔬晴可斲。幽尋月吐嶺。高臥日照屋。應念塵中人。胡爲自羈跼。

村居

文同

日影滿松牕。雲開雨初止。晴林梨棗熟。曉巷兒童喜。牛羊深澗下。鳧鴈寒塘裏。田父酒新成。餅罌饋鄰里。至下馬磧。憇於北山僧舍。有閣曰懷賢。南直斜谷。西臨五丈原。諸葛孔明所從出師也。

蘇軾

南望斜谷口。三山如犬牙。西觀五丈原。鬱屈如長蛇。有懷諸葛公。萬騎出漢巴。吏士寂如水。蕭蕭聞馬嘶。公才與曹丕。豈止十倍加。顧瞻三輔間。勢若風卷沙。一朝長星墜。竟使蜀婦髻。山僧豈知此。一室老烟霞。往事逐雲散。故山依渭斜。客來空弔古。清淚落悲笳。

送鄭戶曹

水遶彭祖樓。山圍戲馬臺。古來豪傑地。千歲有餘哀。隆準飛上天。重瞳亦成灰。白門下呂布。大星殞臨淮。尙想劉玄德。置酒此徘徊。邇來苦寂寞。廢圃多蒼苔。河從百步響。山到九里迴。山水自相激。夜聲轉風雷。蕩蕩清河孺。黃樓我所開。秋月墮城角。春風搖酒杯。遲君爲坐客。新詩出瓊瑰。樓成君已去。人事固多乖。

他年君倦游。白首賦歸來。登樓一長嘯。使君安在哉。

送運判朱朝奉入蜀

藹藹青城雲。娟娟峨眉月。隨我西北來。照我光不滅。我在塵土中。白雲呼我歸。我游江湖上。明月濕我衣。岷峨天一方。雲月在我側。謂是山中人。相望了不隔。夢尋西南路。默數短長亭。似聞嘉陵江。跳波吹枕屏。送君無一物。清江飲君馬。路穿慈竹林。父老拜馬下。不用驚走藏。使者我友生。聽訟如家人。細說爲汝評。若逢山中友。問我歸何日。爲話腰腳輕。猶堪踏泉石。

高郵陳直躬處士畫鴈

野鴈見人時。未起意先改。君從何處看。得此無人態。無乃槁木形。人禽兩自在。北風振枯葦。微雪落璀璨。慘澹雲水昏。晶熒沙礫碎。弋人悵何慕。一舉渺江海。

書鄴陵王主簿所畫折枝

瘦竹如幽人。幽花如處女。低昂枝上雀。搖蕩花間雨。雙翎決將起。衆葉紛自舉。可憐採花蜂。清蜜寄兩股。若人富天巧。春色入毫楮。懸知君能詩。寄聲求妙語。

金山妙高臺

我欲乘飛車。東訪赤松子。蓬萊不可到。弱水三萬里。不如金山去。清風半帆耳。中有妙高臺。取華嚴經德。雲比丘所居。妙高峯爲義。雲峯自孤起。仰觀初無路。誰信平如砥。臺中老比丘。子元長老。碧眼照牕几。巉巖玉爲骨。凜凜霜入齒。機鋒不可觸。千偈如翻水。何須尋德雲。卽此比丘是。長生未暇學。請學長不死。

登常山絕頂廣麗亭

西望穆陵關。東望瑯邪臺。南望九仙山。北望空飛埃。相將叫虞舜。遂欲歸蓬萊。嗟我二三子。狂飲亦荒哉。紅裙欲仙去。長笛有餘哀。清歌入雲霄。妙舞纖腰回。自從有此山。白石封蒼苔。何嘗有此樂。將去復徘徊。人生如朝露。白髮日夜催。棄置當何言。萬劫終飛灰。

端午遍遊諸寺得禪字

肩輿任所適。遇勝輒留連。焚香引幽步。酌茗開淨筵。微雨止還作。小窗幽更妍。盆山不見日。草木自蒼然。忽登最高塔。眼界窮大千。卞峯照城郭。震澤浮雲天。深沈既可喜。曠蕩亦所便。幽尋未云畢。墟落生晚烟。歸來記所歷。耿耿清不眠。道人亦未寢。孤燈同夜禪。

與王郎昆仲及兒子邁繞城觀荷花

清風定何物。可愛不可名。所至如君子。草木有嘉聲。我行本無事。孤舟任斜橫。中流自偃仰。適與風相迎。舉盃屬浩渺。樂此兩無情。歸來兩溪間。雲水夜自明。

月夜

孔仲平

平生最好月。況此秋夜闌。長風送蕩漾。浩露洗團圓。仰頭視虛空。光彩如可餐。星辰斂芒角。河漢收波瀾。更無微雲翳。挂此白玉盤。六合靜皎皎。萬木涼珊珊。爲爾廢昏臥。裴回更漏殘。更登高處望。歷歷見湖山。爽氣集冰雪。清心生羽翰。便欲御冷然。因之遊廣寒。一臨天池水。沐浴隨飛仙。

曹亭獨登

問我當何之。曹亭蒼木外。江湖水方漲。曠闊吾所愛。微風撼晚色。爽氣回秋籟。楊柳隱官隄。芙蓉接公廡。白雲依山起。點綴若圖繪。何須招客遊。清興自無輩。落日更憑欄。下看飛鳥背。

宿寶泉山慧日寺

賀鑄

日入不遑息。驅車更之東。回蹊出蒙密。解袂迎長風。風從何許來。歷歷江南鐘。頓轡阿蘭若。虛庭月正中。流螢逗深竹。白鳥巢青松。華燈耿翠箔。瑤花擢春叢。絕境美清夜。悅非塵界逢。惜無一尊酒。幸與之子同。遇越客嚴生。明發卽南北。浮生兩飛蓬。

答杜仲觀登叢臺見寄

高風蕩河漢。白露被寒菊。下有絡緯蟲。淒酸生意促。華年不相待。去我何流速。老步失騰驤。短轅甘踟蹰。伊人濮陽秀。方厭折腰辱。仕道塞榛蕪。低徊避虬螭。邯鄲古都會。陳迹武靈築。興發卽登臨。西南幾窮目。新詩琢瑤琰。疊寄兩三幅。一聽郢中歌。陽春回草木。行將及瓜代。暫喜擺羈束。鞭馬經相過。連朝奉遊躡。隻雞與斗黍。禮意未爲足。何以遇高陽。多營甕頭醪。

上已後一日登快哉亭

上已信嘉辰。流觴傳舊俗。良遊悵不遂。吏局方有屬。東風吹曉雨。萬竅嗥林麓。疑有泊舟人。狂歌河女曲。逾朝始澄霽。物色如新沐。城角趨危亭。登臨慰幽獨。紛華掃不見。蝴蝶飛平綠。竚倚窮夕曛。悠哉此心目。

題竹石牧牛

黃庭堅

野次小嶂嶸。幽篁相依綠。阿童三尺筐。御此老觳觫。石吾甚愛之。勿遣牛礪角。牛礪角尙可。牛鬪殘我竹。

次韻吳宣義三徑懷友

佳眠未知曉。屋角聞晴晞。萬事頗忘懷。猶牽故人夢。采蘭秋蓬深。汲井短綆凍。起看冥飛鴻。乃見天宇空。甚念故人寒。誰省機與綜。在者天一方。日月老賓送。往者不可言。古柏守翁仲。

留王郎

河外吹沙塵。江南水無津。骨肉常萬里。寄聲何由頻。我隨簡書來。顧影將一身。留我左右手。奉承白頭親。小邦王事略。蟲鳥聲無人。王甥解鞍馬。夜語雞喚晨。母慈家人肥。女慧男垂紳。有田爲酒事。豚韭及秋春。生涯得如此。舊學更光新。索去何草草。少留慰艱勤。百年才一炊。六籍經幾秦。要知胸中有。不與跡同陳。鄂人懷妙質。聊欲運吾斤。

春日雜興

秦觀

寢瘵倦文史。駕言從遨嬉。颶風舉遙濺。規日麗清漪。含桃粲朱實。杜若懷碧滋。娉娉弱絮墮。圍圍文魴馳。明霞廓遠矚。哀禽攪離思。緝草天際合。孤雲川上移。寬閒絕輪鞅。重復多路歧。信美難久佇。歸歟從此治。

書懷寄李相如

晁沖之

秋風吹畦蔬。農事亦已闌。黃黃杞下菊。佳色尸冢間。我生復何如。憔悴常照顏。清晨戴星出。薄暮及日還。飢餓二十載。老髮羞儒冠。天下有佳人。秀擢如芝蘭。憮然念夙昔。風流得餘懽。緬想蒲柳姿。與君同歲寒。一別事瓦裂。令人氣如山。

離黃州

張耒

扁舟發孤城。揮手謝送者。山回地勢卷。天豁江面瀉。中流望赤壁。石腳插水下。昏昏烟霧嶺。歷歷漁樵舍。居夷實三載。鄰里通假借。別之豈無情。老淚爲一洒。篙工起鳴鼓。輕櫓健於馬。聊爲過江宿。寂寂樊山夜。

出長夏門

出郭心已清。青山忽相對。游人傍流水。俯仰秀色內。誰張蒼玉屏。中斷神斧快。清伊瀉其間。銀漢曳天派。參差樓觀出。杳靄林麓邃。巖聲送遠響。水影弄空翠。同遊得君子。與與煙霞會。選勝雖自茲。高懷已塵外。

宿長山寺

劉 弇

蒼山兩蟠虬。傑勢分天矯。不緣事幽尋。茲地終難到。破暝紫烟生。寫谷清樾好。村長下牛羊。雲綻入歸鳥。松風卷孤磬。夜半秋聲小。客懷方未央。千里漫白道。庭樹一鳥驚。愁看楚天曉。

次韻毛達可給事秋懷念歸

倪 濤

結茅遠人村。破屋水半扉。涼葉墮清響。空山轉斜暉。微官臥江漢。素心久依依。十年天涯秋。搖落幾芳菲。馬蹄歲月去。蝶夢東南飛。平生邱壑志。有言輒乖違。不如孤征鴻。春風自知歸。

懷西山

葉夢得

西山十畝強。高下略不齊。嵌空抱奇秀。上有凌雲梯。架屋八九間。茅簷敢辭低。所欲面勢好。老稚通扶攜。密竹轉修徑。老松故成蹊。仲冬景氣肅。碧草猶萋萋。仰視天宇大。四觀渺回溪。徐行信足力。未畏成顛隕。用意各有適。孰云無町畦。平生幾濡首。末路乃噬臍。不作巢幕燕。肯從觸藩羝。胡爲濫麀鉞。坐聽鳴鼓鼙。外物委蟲臂。全生思馬蹄。可能三徑草。歸路老更迷。

送沈傳曜

十峯摩青空。東望烏氏墩。豈忘宿春糧。終媿一款門。邂逅此相遇。傾懷得徐論。人言解牛刀。要使當劇煩。未悟清廟器。朱絃列疊尊。我衰百慮息。但念三畝園。王師肅西征。萬馬先雲屯。何力賞賜履。緬慙羨歸軒。寄聲舴艋舟。想見浮鴈村。清冷尙可釣。無使霽水渾。

出山道中

陳與義

雨歇澹春曉。雲氣山腰流。高崖落絳葉。恍如人世秋。避地時忽忽。出山意悠悠。溪急竹影動。谷虛禽響幽。同行得快士。勝處頻淹留。乘除了身世。未恨落房州。

夏日集葆真池上以綠陰生晝靜賦詩得靜字

清池不受暑。幽討起予病。長安車轍邊。有此荷萬柄。是身唯可懶。共寄無盡興。魚遊水底涼。鳥語林間靜。談餘日亭午。樹影一時正。清風不負客。意重百金贈。聊將兩鬢蓬。起照千丈鏡。微波喜搖人。小立待其定。梁王今何許。柳色幾衰盛。人生行樂耳。詩律已其贖。邂逅一尊酒。他年五君詠。重期踏月來。夜半嘯煙艇。

夜步隄上

人間睡聲起。幽子方獨步。倚杖看白雲。亭亭水中度。十月鴈背高。三更河流去。物生各擾擾。念此煎百慮。聊將憂世心。數遍橋西樹。

夜賦

泊舟華容縣。湖水終夜明。淒然不能寐。左右菰蒲聲。窮途事多違。勝處亦心驚。三更螢火闌。萬里天河橫。

秋興

張九成

阿瞞狼狽地。山澤空崢嶸。強弱與興衰。今古莽難平。腐儒憂平世。況復值甲兵。終然無寸策。白髮滿頭生。
半夜驚夢回。桐葉紛索索。杖藜視天宇。雨罷雲收腳。清風拂襟裾。片月墮籬落。嗟我遊已倦。悵此久淹泊。
豆畦今已花。稻壠行可穫。翻思黃卷中。古人誰可作。田園愛潛歸。簞瓢識顏樂。譬彼鷓鴣心。平生在叢薄。

涼月

劉子翬

涼月未出山。浮雲半空白。徘徊步軒窗。宛若待佳客。經林漏飛輝。映澈生華澤。及茲秋景清。吾廬更幽寂。
殊觀發祕藏。妙聽生寥闐。營營息初機。炯炯懷新得。豈無平生心。所樂已非昔。天旋河漢動。夜久鄰機息。
淒淒感庭蘭。歲暮霜霰集。呼兒溫濁醪。獨酌醉永夕。

渡淮

鳴鼙渡長淮。霏烟散清晨。皎皎初日光。照耀草木新。橫林度餘碧。疊嶂開嶙峋。移橈失向背。烟波浩無垠。
兒童相權歌。余心亦欣欣。輕帆互相踰。畫鷁映流津。徘徊望洲渚。悠然獨懷人。樵漁有棲遯。寂寞誰問鄰。
暮風翻洪濤。魚蝦亦有神。四顧天地黑。孤舟恐漂淪。

聞箏作

月高夜聞箏。聲從綺窗來。隨風更迢遞。縈雲暫徘徊。餘音若可玩。繁絃互相催。不見理箏人。遙知心所懷。
寧悲舊寵棄。豈念新期乖。含情鬱不發。寄曲宣餘哀。一彈飛霜零。再撫流光頹。每恨聽者稀。銀甲生浮埃。
幽幽孤鳳鳴。衆鳥聲難諧。盛年嗟不偶。況乃容華衰。道同符片諾。志異勞百媒。栖栖牆東客。亦抱凌雲才。

過平望

范成大

寸碧闌高浪。孤虛明夕陽。水柳搖病綠。霜蒲蘸新黃。孤嶼乍舉網。蒼烟忽鳴榔。波明荇葉顫。風熟蘋花香。雞犬各村落。蓴鱸近江鄉。野寺對客起。樓陰濯滄浪。古來離別地。清詩斷人腸。亭前舊時水。還照兩鴛鴦。

新嶺

瘦馬兀蒼騰。荒雞號蒼莽。絲窠冒朝露。籬落羃蛛網。宿雲拂樹過。飛泉擘山響。老桑踞潛蚪。怪蔓挂騰蟒。山行何許深。空翠滴羈鞅。釀愁積雨寒。破悶朝日放。瞳瞳赤幟張。昱昱金鉦上。浮動草花馥。清和野禽唱。僕夫有好語。沙平路如掌。惟憂三溪阻。橋斷山水漲。

鴈翅夾口小酌

陸游

墟烟淡將散。江雨細欲無。回風吹衣襟。晴光滿菰蒲。隱几樂此時。清和如夏初。犬吠船丁歸。小市得美蔬。歡言酌清醪。侑以案上書。雖云泊江渚。何異歸林廬。

夜出偏門還三山

月行南斗邊。人歸西郊路。水風吹葛衣。草露濕芒屨。漁歌起遠汀。鬼火出破墓。淒清醒醉魂。荒怪入詩句。到家夜已半。佇立叩蓬戶。穉子猶讀書。一笑慰遲暮。

東西家

東家雲出岫。西家籠半山。西家泉落澗。東家鳴珮環。相對籬數掩。各有茆三間。芹羹與麥飯。日不廢往還。兒女若一家。雞犬意自閒。我亦思卜鄰。餘地君勿墜。

齋中雜興

閒居寂無客。柴門晝常關。孤舟小於葉。放浪烟水間。樹暗楊梅村。露下白蓮灣。釣魚樵風涇。買酒石帆山。向來支許輩。恐亦無此閒。道逢若耶叟。握手開蒼顏。

蘇木灘

楊萬里

灘雪清濺眸。灘雷怒醒耳。落洪翠壁立。跳波碧山起。船進若戰勝。船退亦遊戲。若非篙師苦。進退皆可喜。忽逢下灘舟。掀舞快雲駛。何曾費一棹。纔瞬已數里。會有上灘時。得意君勿恃。

明發陳公徑過摩舍那灘石峯下

澄潭湧晴暈。不風自成花。回流如倦客。出門復還家。江晴已數日。新漲沒舊沙。知是前溪雨。濕雲尙橫斜。山轉江亦轉。江行山亦行。風鬢照玉鏡。素練縈青屏。我本山水客。澹無軒冕情。塵中悔一來。事外懷孤征。忽乘滄浪舟。仰高俯深清。餐翠腹可飽。飲淥身須輕。鷓鴣不相識。還作故園聲。南中山絕佳。所恨人烟稀。略無好事人。結茅臨深溪。峯頂可月亭。岸石卽釣磯。空令烟中猿。挂崖弄漣漪。山多人自少。人遠山益奇。我舟行不留。過眼山如馳。過眼意已足。久留亦何爲。

對雨

朱子

虛堂一遊囑。驟雨滿空至。的皪散芳塘。冥濛結雲氣。勢逐風威亂。望窮山景翳。烟靄集林端。蒼茫欲無際。涼氣襲輕裾。炎氛起秋思。對此景淒淒。還增沖淡意。

六月十五日詣水公庵雨作

雲起欲爲雨。中川分晦明。纔驚橫嶺斷。已覺疎林鳴。空際旱塵滅。虛堂涼思生。頽簷滴瀝餘。忽作流泉傾。況此高人居。地偏園景清。芳馨雜峭蒨。俯仰同鮮榮。我來偶茲適。中懷澹無營。歸路綠泱泱。因之想巖耕。

秋日苦病齋居奉懷黃子厚劉平父及山間諸兄友

出山今幾時。忽忽歲再秋。江湖豈不永。我興終悠悠。況復逢早魃。農畝無餘收。赤子亦何辜。黃屋勞深憂。而我忝朝寄。政荒積憊尤。懷痾臥空閣。惻愴增綢繆。東南望故山。上有玄烟浮。平生采芝侶。寂寞今焉儔。朝遊雲峯巔。夕宿寒巖幽。爲我泛瑤瑟。泠然發清謳。裂牋寄晨風。問我君何求。洪濤捩君柁。狹硤摧君輈。君還苦不早。無乃非良謀。再拜謝故人。低徊更包羞。桂華幸未歇。去矣從公遊。

石馬斜川之集分韻賦詩得燈字

改歲風日好。出門欣得朋。復招里中彥。及此雲間僧。行行涉清波。斯亭一來登。徙倚綠樹蔭。摩挲蒼石稜。遙瞻原野春。仰視天宇澄。一水旣紆鬱。羣山正峻嶒。時禽悅新陽。潛魚躍輕冰。卻念去年日。俯仰愁予膺。長吟斜川詩。日落寒烟凝。暝色變晴景。清尊照華燈。頽顏感川徂。稚齒歡年增。酒盡不能起。朱欄各深凭。

臥龍庵武侯祠奉同光延之廬山雜詠十四篇之六

空山龍臥處。蒼峭神所鑿。下有寒潭幽。上有明河落。我來愛佳名。小築寄幽壑。永念千載人。丹心豈今昨。英姿儼繪事。凜若九原作。寒藻薦芳馨。飛泉奉明酌。公來識此意。顧步慘不樂。抱膝一長吟。神交付冥漠。

陶公醉石歸去來館廬山雜詠之十一

予生千載後。尙友千載前。每尋高士傳。獨歎淵明賢。及此逢醉石。謂言公所眠。況復巖壑古。縹緲藏風烟。

仰看喬木陰。俯聽橫飛泉。景物自清絕。優游可忘年。結廬倚蒼峭。舉觴酌潺湲。臨風一長嘯。亂以歸來篇。

康王谷水簾廬山雜詠之十三

循山西北鶩。崎嶇幾經邱。前行荒蹊斷。豁見清溪流。一涉臺殿古。再涉川原幽。縈紆復屢渡。乃得寒巖陬。飛泉天上來。一落散不收。披崖日璀璨。噴壑風颼颼。追新一絕品。淪茗澆窮愁。敬酌古陸子。何年復來遊。陸鴻漸茶經第此水爲天下第一。

斜川日雪觀所賦

張 栻

行客念故里。勞者思少休。如何歲華新。尙爾天南游。涉五遇佳日。品題自名流。聊復措病眼。沙邊玩輕鷗。和風着冠巾。春意動林邱。緬懷千載人。孤高諒難儔。亦有一二士。舉杯相勸酬。未知吾故園。草木如此不。政拙甘下考。智短空百憂。賜歸儻蒙幸。舊盟良可求。

昔遊詩

姜 夔

洞庭八百里。玉盤盛水銀。長虹忽照影。大哉五色輪。我舟渡其中。晃晃驚我神。朝發黃陵祠。暮至赤沙曲。借問此何處。滄灣三十六。青蘆望不盡。明月耿如燭。灣灣無人家。只就蘆花宿。

效孟郊體

謝 翱

閒庭生柏影。荇藻交行路。忽忽如有人。起視不見處。牽牛秋正中。海白夜疑曙。野風吹空巢。波濤在孤樹。

卷二

七言古

晉祠

歐陽修

古城南出十里間。鳴渠夾路何潺潺。行人望祠下馬謁。退卽祠下窺水源。地靈草木得餘潤。鬱鬱古柏含蒼烟。并兒自古事豪俠。戰爭五代幾百年。天開地闢眞主出。猶須再駕方凱旋。頑民盡遷高壘削。秋草自綠埋空垣。并人昔遊晉水上。清鏡照耀涵朱顏。晉水今入并州裏。稻花漠漠澆平田。廢興髣髴無舊老。氣象寂寞餘山川。惟存祖宗聖功業。干戈象舞被管絃。我來覽登爲歎息。暫照白髮臨清泉。鳥啼人去廟門闔。還有山月來娟娟。

送徐生之澠池

河南地望雄西京。相公好賢天下稱。吹噓死灰生氣燄。談笑暖律回嚴凝。曾陪罇俎被顧盼。羅列臺閣皆名卿。徐生南國後來秀。得官古縣依嶠陵。腳靴手板實卑賤。賢雋未可吏事繩。攜文百篇赴知己。西望未到氣已增。我昔初官便伊洛。當時意氣尤驕矜。主人樂士喜文學。幕府最盛多交朋。園林相映花百種。都邑四顧山千層。朝行綠槐聽流水。夜飲翠幙張紅燈。爾來飄流二十載。鬢髮蕭索垂霜冰。同時並遊在者幾。舊事欲說無人應。文章無用等畫虎。名譽過耳如飛蠅。榮華萬事不入眼。憂患百慮來填膺。羨子年少正得路。有如扶桑初日昇。名高場屋已得雋。世有龍門今復登。出門相送親與友。何異籬鷄瞻雲鵬。嗟吾筆硯久已格。感激短章因子興。

龍樓鳳閣鬱崢嶸。深宮不聞更漏聲。紅紗蠟燭愁夜短。綠窗鳴鴉催天明。一聲兩聲人漸起。金井轆轤聞汲水。三聲四聲促嚴粧。紅靴玉帶奉君王。萬年枝軟風露濕。上下枝間聲轉急。南衙促仗三衛列。九門放鑰千官入。重城禁藥鎖池臺。此鳥飛從何處來。君不見潁河東岸村陂闊。山禽野鳥常嘲啜。田家惟聽夏雞聲。鳴鴉京西林人謂之夏雞。夜夜墮頭耕曉月。可憐此樂獨吾知。眷戀君恩今白髮。

春日西湖寄謝法曹歌

西湖春色歸。春水綠於染。羣芳爛不收。東風落如糝。參軍春思亂如雲。白髮題詩愁送春。遙知湖上一樽酒。能憶天涯萬里人。萬里思春尙有情。忽逢春至客心驚。雪消門外千山綠。花發江邊二月晴。少年把酒逢春色。今日逢春頭已白。異鄉物態與人殊。惟有東風舊相識。

何君寶畫

梅堯臣

燕馬易畫。吳牛難圖。馬骨應細。牛骨麓。馬毛要密。牛毛疎。麓疎必辨別。細密多模糊。乃知戴嵩筆。能出韓幹徒。幹馬精神在韁勒。嵩牛怒鬪無牽拘。昨日何家觀小軸。絹雖破爛色不渝。二頭相觸角競犄。前腳如跪。後腳舒尾。株場直脊。脊蹙筋力寫盡。蹄腕殊一勝。一敗又苦似。勝者狠逐。敗者趨。卷窮赤印置。小字置字。乃是陶尙書。尙書國初人。愛畫收幾廚。買時不惜金。與帛帛載羊車。錢載驢。後世兒孫不能保。賣入窮市。無須臾。凡目矜新不重故。千錢酬直皆笑愚。四牛遂爲何氏有。裝背入眼天下無。坐中吾儕趣已異。又喜玄女傳兵符。此本實稱鬪令畫。下筆簡細容顏姝。三人鬼狀一牛首。八女二十美丈夫。黃帝中間蔭葩蓋。霞扇錯玳旌。擁朱冠服難知歲。月遠但見儀衛森清都。復觀鹿臺獨夫受。妲己不笑何由娛。酒池肉林

騎行禽。剖心斲脛堪悲吁。數幅吳王宴西子。綵舟張樂當姑蘇。宮娥數百簇高下。鬢髻一一紅芙蓉。危峯細浪得平遠。前對洞庭傍太湖。商紂夫差可垂誠。歷世傳玩參盤孟。鷗鷹草木不足記。特詠此事心何如。

華星篇時視役河上寄郡中諸同舍

司馬光

涼風淨掃雲無跡。海月未生星歷歷。貝聯珠貫拱北辰。三五縱橫此何夕。重樓疊榭出秋空。鷓鴣露寒連桂宮。瑤井迥臨丹闕外。玉繩斜挂瑣牕中。征人遠別空閨悄。鐘漏蕭疎天不曉。碧紗輾轉無復眠。臥視寒光度華沼。漢家賢將戍臨洮。結髮從軍今二毛。誰憐身老心猶壯。深入長占太白高。豐城古劍沈淪久。匣中夜半雙龍吼。乃知神物不自藏。紫氣依稀見牛斗。有客離居望所親。遙知清夜會荀陳。隄繇未息無由去。不及浮查河畔人。

純甫出釋惠崇畫要子作詩

王安石

畫史紛紛何足數。惠崇晚出吾最許。旱雲六月漲林莽。移我翛然墮洲渚。黃蘆低摧雪翳土。鳧鴈靜立將儔侶。往時所歷今在眼。沙平水淡西江浦。暮氣沈舟暗魚罟。歌眠嘔軋如聞櫓。頗疑道人三昧力。異域山川能斷取。方諸承水調幻藥。洒落生綃變寒暑。金坡巨然山數堵。粉墨空多真漫與。大梁崔白亦善畫。曾見桃花淨初吐。酒酣弄筆起春風。便恐飄零作紅雨。流鸞探枝婉欲語。蜂蜜掇蕊隨翅股。一時二子皆絕藝。裘馬穿羸久羈旅。華堂豈惜萬黃金。苦道今人不如古。

遊金山寺

蘇軾

我家江水初發源。宦遊直送江入海。聞道潮頭一丈高。天寒尚有沙痕在。中泠南畔石盤陀。古來出沒隨

濤波試登絕頂望鄉國。江南江北青山多。羈愁畏晚尋歸楫。山僧苦留看落日。微風萬頃靴文細。斷霞半空魚尾赤。是時江月初生魄。二更月落天深黑。江心似有炬火明。飛燄照山棲鳥驚。悵然歸臥心莫識。非鬼非人竟何物。江山如此不歸山。江神見怪驚我頑。我謝江神豈得已。有田不歸如江水。是夜所見如此。寓居定惠院之東雜花滿山有海棠一株土人不知貴也。

江城地瘴蕃草木。只有名花苦幽獨。嫣然一笑竹籬間。桃李漫山總麤俗。也知造物有深意。故遣佳人在空谷。自然富貴出天姿。不待金盤薦華屋。朱唇得酒暈生脣。翠袖卷紗紅映肉。林深霧暗曉光遲。日暖風輕春睡足。雨中有淚亦悽愴。月下無人更清淑。先生食飽無一事。散步逍遙自捫腹。不問人家與僧舍。拄杖敲門看修竹。忽逢絕豔照衰朽。歎息無言措病目。陋邦何處得此花。無乃好事移西蜀。寸根千里不易到。銜子飛來定鴻鵠。天涯流落俱可念。爲飲一樽歌此曲。明朝酒醒還獨來。雪落紛紛那忍觸。

海市并敘

予聞登州海市舊矣。父老云。常出於春夏。今歲晚不復見矣。予到官五日而去。以不見爲恨。禱於海神。廣德王之廟。明日見焉。乃作此詩。

東方雲海空復空。羣仙出沒空明中。蕩搖浮世生萬象。豈有貝闕藏珠宮。心知所見皆幻影。敢以耳目煩神工。歲寒冰冷天地閉。爲我起鰐魚龍。重樓翠阜出霜曉。異事驚倒百歲翁。人間所得容力取。世外無物誰爲雄。率然有請不我拒。信我人厄非天窮。潮陽太守南遷歸。喜見石廩堆祝融。自言正直動山鬼。豈知造物哀龍鍾。信眉一笑豈易得。神之報汝亦已豐。斜陽萬里孤鳥沒。但見碧海磨青銅。新詩綺語亦安

用相與變滅隨東風。

武昌西山并序

嘉祐中翰林學士承旨鄧公聖求爲武昌令常遊寒溪西山。山中人至今能言之。軾謫居黃岡與武昌相望亦常往來溪山間。元祐元年十一月二十九日考試館職與聖求會宿玉堂偶話舊事聖求嘗作元次山窪樽銘刻之巖石因爲此詩請聖求同賦當以遺邑人使刻之銘側。

春江淥漲蒲萄醅。武昌官柳知誰栽。憶從樊口載春酒。步上西山尋野梅。西山一上十五里。風駕兩掖飛崔嵬。同遊困臥九曲嶺。褰衣獨到吳王臺。中原壯望在何許。但見落日低黃埃。歸來解劍亭前路。蒼崖半入雲濤堆。浪翁醉處今尙在。石臼杯飲無樽罍。爾來古意誰復嗣。公有妙語留山隈。至今好事除草棘。常恐野火燒蒼苔。當時相望不可見。玉堂正對金鑾開。豈知白首同夜臥。看椽燭高花摧。江邊曉夢忽驚斷。銅環玉鎖鳴春雷。山人悵空猿鶴怨。江湖水生鴻鴈來。請公作詩寄父老。往和萬壑松風哀。

二十七日自平陽至斜谷宿於南山中蟠龍寺

橫槎晚渡碧澗口。騎馬夜入南山谷。谷中暗水響瀧瀧。嶺上疎星明煜煜。寺藏崑底千萬仞。路轉山腰三百曲。風生饑虎嘯空林。月黑驚鷺竄修竹。入門突兀見深殿。照佛青燐有殘燭。媿無酒食待遊人。旋斫杉松煮溪蕨。板閣獨眠驚旅枕。木魚曉動隨僧粥。起觀萬瓦鬱參差。日亂千巖散紅綠。門前商賈負椒菴。山後咫尺連巴蜀。何時歸耕江上田。一夜心逐南飛鵠。

石鼓歌

冬十二月歲辛丑。我初從政見魯叟。舊聞石鼓今見之。文字鬱律蛟蛇走。細觀初以指畫肚。欲讀嗟如箝在口。韓公好古生已遲。我今況又百年後。強尋偏傍推點畫。時得一二遺八九。我車旣攻馬亦同。其魚維鱣貫之柳。古器縱橫猶識鼎。衆星錯落僅名斗。模糊半已似癡膩。詰曲猶能辨跟肘。娟娟缺月隱雲霧。濯濯嘉禾秀莖莠。漂流百戰偶然存。獨立千載誰與友。上追軒頡相唯諾。下揖冰斯同。穀印侯反穀。乃侯反。憶昔周宣歌鴻鴈。當時籀史變蝌蚪。厭亂人方思聖賢。中興天爲生耆耆。東征徐鹵闕虓虎。北伏犬戎隨指噉。蘇后反。象胥雜沓貢狼鹿。方召聯翩賜圭卣。遂因鼓鞶思將帥。豈爲考擊煩矇眊。何人作頌比崧高。萬古斯文高岫嶽。勳勞至大不矜伐。文武未遠猶忠厚。欲尋年歲無甲乙。豈有名字記誰某。自從周衰更七國。竟使秦人有九有。掃除詩書誦法律。投棄俎豆陳鞭杻。當年何人佐祖龍。上蔡公子牽黃狗。登山刻石頌功烈。後者無繼前無偶。皆云皇帝巡四國。烹滅彊暴救黔首。六經旣已委灰塵。此鼓亦當遭擊掊。傳聞九鼎淪泗上。欲使萬夫沈水取。暴君縱欲窮人力。神物義不污秦垢。是時石鼓何處避。無乃天工令鬼守。與亡百變物自閒。富貴一朝名不朽。細思物理坐歎息。人生安得如汝壽。

古纏頭曲

鷓絃鐵撥世無有。樂府舊工惟尙叟。一生喙硬眼無人。坐此窮困今白首。翠鬢女子年十七。指法已似呼韓婦。驚帆渡海風掣迴。滿面塵沙和淚垢。青衫不逢溢浦客。紅袖謾插曹綱手。邇來一見哀駘佗。便著臂拜十分爲我壽。世人只解錦纏頭。與汝作詩傳不朽。

送戴蒙赴成都玉局觀將老焉

拾遺被酒行歌處。野梅官柳西郊路。聞道華陽版籍中。至今尚有城南杜。我欲歸尋萬里橋。水花風葉暮蕭蕭。芋魁徑尺誰能盡。椴木三年已足燒。百歲風狂定何有。羨君今作峨眉叟。縱未家生執戟郎。也應世出埋輪守。莫欺老病未歸身。玉局他年第幾人。會待子猷清興發。還須雪夜去尋君。

龜山辯才師

此生念念浮雲改。寄語長淮今好在。故人宴坐虹梁南。新河巧出龜山背。木魚呼客振林莽。鐵鳳橫空飛綵繪。忽驚堂宇變雄深。坐覺風雷生警歛。羨師遊戲浮漚間。笑我榮枯彈指內。嘗茶看畫亦不惡。問法求詩了無礙。千里孤帆又獨來。五年一夢誰相對。何當來世結香火。永與名山供井磑。

王維吳道子畫

何處訪吳畫。普門與開元。開元有東塔。摩詰留手痕。吾觀畫品中。莫如二子尊。道子實雄放。浩如海波翻。當其下手風雨快。筆所未到氣已吞。亭亭雙林間。彩暈扶桑暎。中有至人談寂滅。悟者悲涕迷者手自捫。鬢君鬼伯千萬萬。相排競進頭如黿。摩詰本詩老。佩芷襲芳蓀。今觀此壁畫。亦若其詩清。且敦祇園弟子畫。鶴骨心如死。灰不復溫。門前兩叢竹。雪節貫霜根。交柯亂葉動無數。一一皆可尋其源。吳生雖妙絕。猶以畫工論。摩詰得之於象外。有如仙。翻謝籠樊。吾觀二子皆神俊。又於維也斂衽無間言。

臘日遊孤山訪惠勤惠思二僧

天欲雪。雲滿湖。樓臺明滅。山有無。水清石出魚可數。林深無人鳥相呼。臘日不歸對妻孥。名尋道人實自

娛。道人之居在何許。寶雲山前路盤紆。孤山孤絕誰肯廬。道人有道山不孤。紙牕竹屋深自暖。擁褐坐睡依圓蒲。天寒路遠愁僕夫。整駕催歸及未晡。出山迴望雲木合。但見野鶴盤浮圖。茲遊淡泊歡有餘。到家恍如夢蘧蘧。作詩火急追亡逋。清景一失後難摹。

書王定國所藏烟江疊嶂圖王晉卿畫

江上愁心千疊山。浮空積翠如雲烟。山耶雲耶遠莫知。烟空雲散山依然。但見兩崖蒼蒼暗絕谷。中有百道飛來泉。縈林絡石隱復見。下赴谷口爲奔川。川平山開林麓斷。小橋野店依山前。行人稍度喬木外。漁舟一葉江吞天。使君何從得此本。點綴毫末分清妍。不知人間何處有此境。徑欲往置二頃田。君不見武昌樊口幽絕處。東坡先生留五年。春風搖江天漠漠。暮雲卷雨山娟娟。丹楓翻鴉伴水宿。長松落雪驚鷗眠。桃花流水在。人世武陵豈必皆神仙。江山清空我塵土。雖有去路尋無緣。還君此畫三歎息。山中故人應有招我歸來篇。

瓜步阻風

孔武仲

昨日焚香謁聖母。青山鞠躬如負弩。但乞天開萬里明。掃去浮雲戢風雨。謂宜言發卽響報。豈知神不聽我語。門前白浪如銀山。江上狂風如怒虎。船癡艣硬不能拔。未免棲遲傍洲渚。輕盈但愛白鷗飛。顛頓可憐芳草舞。三江五湖歷已盡。勢合平夷反齟齬。上水歌呼下水愁。北船縈絆南舡去。寄言南舡莫雄豪。萬事低昂如桔槔。我當賣劍買牲牢。再歸靈宇陳局尻。黃金壺樽沃香醪。神喜借以南風高。揚帆拍手笑爾曹。不知流落何江臯。荒洲寂寥聽怒號。

題漢陽招真亭亭在大別峰頂郡守吳興劉誼宜翁營構以招江夏黃鶴之仙劉自稱有不死術
亭成後二年物故。

賀鑄

大別山巔清沔尾。飛亭岩巖帶雲起。清狂使君初燕喜。拍手招呼黃鶴子。元津煉出太陽酥。丰茸胎髮蒙頭顱。每誇久落北鄴籍。豈意齋恨歸黃墟。越客登臨興何有。愁不能言病妨酒。殘陽雲夢窅然深。尙欲開襟吞八九。羽駕飄飄安在哉。使君餘迹已塵埃。但見庾令樓橫烟樹杪。角聲催月渡江來。

金山行

郭祥正

金山杳在滄溟中。雲崖冰柱浮仙宮。乾坤扶持自今古。日月髣髴躔西東。我泛靈槎出塵世。搜索異境窺神工。一朝登臨重太息。四時想像何其雄。卷簾夜閣掛北斗。大鯨駕浪吹長空。舟摧岸斷豈足數。往往霹靂鏃蛟龍。寒蟾八月蕩搖海。秋光上下磨青銅。鳥飛不盡暮天碧。漁歌忽斷蘆花風。蓬萊久聞未成往。壯觀絕致遙應同。潮生潮落夜還曉。物與數會誰能窮。百年形影浪自苦。便欲此地安微躬。白雲南來入我望。又起歸興隨征鴻。

送范德孺知慶州

黃庭堅

乃翁知國如知兵。塞垣草木識威名。敵人開戶玩處女。掩耳不及驚雷霆。平生端有活國計。百不一試葬九京。阿兄兩持慶州節。十年麒麟地上行。潭潭大度如臥虎。邊人耕桑長兒女。折衝千里雖有餘。論道經邦政要渠。妙年出補父兄處。公自才力應時須。春風旂旗擁萬夫。幕下諸將思草枯。智名勇功不入眼。可用折箠笞羌胡。

書磨崖碑後

春風吹船著活溪。扶藜上讀中興碑。平生半世看墨本。摩挲石刻鬢成絲。明皇不作苞桑計。顛倒四海由祿兒。九廟不守乘輿西。萬官已作烏釋栖。撫軍監國太子事。何乃趣取大物爲。事有至難天幸爾。上皇踣跡遠京師。內間張后色可否。外間李父頤指揮。南內淒涼幾苟活。高將軍去事尤危。臣結春陵二三策。臣甫杜鵑再拜詩。安知忠臣痛至骨。世上但賞瓊瑤詞。同來野僧六七輩。亦有文士相追隨。斷崖蒼蘚對立久。凍雨爲洗前朝悲。

以團茶洮州綠石研贈無咎文潛

晁子智囊可以括四海。張子筆端可以回萬牛。自我得二士。意氣傾九州。道山延閣委竹帛。清都太微望冕旒。貝宮胎寒弄明月。天網下潭一日收。此地要須無不有。紫皇訪問富春秋。晁無咎贈君越侯所貢蒼玉璧。可烹玉麈試春色。澆君胸中過秦論。斟酌古今來活國。張文潛贈君洮州綠石含風漪。能淬筆鋒利如錐。請畫元祐開皇極。第入思齊訪落詩。

聽榮德君鼓琴

月明江靜寂寥中。大家斂袂撫孤桐。古人已矣古樂在。髣髴雅頌之遺風。妙手不易得。善聽良獨難。猶如優曇華。時一出世間。兩忘琴意與己意。迺似不著十指彈。禪心默默三淵靜。幽谷清風淡相應。絲聲誰道不如竹。我已忘言得真性。罷琴牕外月沈江。萬籟俱空七絃定。

富春行贈范振

晁補之

錢塘江北百里餘。漲沙不復生菰蒲。沙田老桑出葉麤。江湖打根根半枯。八月九月秋風惡。風高駕潮晚不落。鼓聲瑟瑟櫓咿啞。爭湊富春城下泊。君家茅屋並城樓。不出山行不記秋。越舶吳帆亦何故。今年明年來復去。

和關彥遠秋風吹我衣

海中羣魚化黃雀。林鳥移巢避歲惡。鄴王城上秋風驚。昔時城中鄴王第。只今蔓草無人行。但見黃河咆哮奔碣石。秋風吹灘起沙礫。翩翩動衣裳。游子悲故鄉。忽憶若耶溪頭采薪鄭巨君。南風溪頭曉。北風溪頭昏。一行作吏。此事便廢。夢中葉落。覺有歸意。歸歟歸歟。吾黨成斐然。君今生二毛。我亦非少年。胡爲車如雞。栖鄴城裏。朝風吹馬鬃。莫風吹馬尾。與人三歲居。如何連屋似千里。我則不狂。曾謂吾狂。不吾知。亦何傷。安能戶三尺。喙家一吭。人亦有言。人各有志。吞若雲夢者。八九長劍耿介倚天外。有如陳仲舉。庭宇亦不治。吾乃今知貴。不若賤。無憂富。不若貧。無求負日之燠。吾重裘。芹子之飫。吾食牛。心戰故臚。得道故肥。吾封侯。匹夫懷璧將誰尤。歸歟歸歟。豈無揚雄宅一區。舍前青山木扶疎。舍後流水有菰蒲。今我不樂。日月除。尺則不足。寸有餘。七十二鑽莫能免。豫且無所可用。乃有百歲樽。龔生竟天天。年非吾徒。

胡戡秀才效歐陽公集古作宛琰堂

君不見廬陵公。往爲學士修書日。詔畀千金訪遺逸。遺文逸字往往出。故都易姓幾兵火。量臀鼎腹細詰詘。道人响嶼空有聞。邱陵仙鬼事恍惚。共和十鼓記亡一。嶧山肉在無復骨。雲陽八體又瓜剖。至使漢童詛尉律。世儒詭正何足臧。公家安取千軸藏。仲尼猶及史之闕。有馬借人吾敢忘。題籤甲乙潁水陽。後來

胡君癖膏肓。傾家自構琬琰堂。搜羅近出補厥亡。荒林圮冢見未嘗。南觀禹穴計渺茫。閉門睥睨在一牀。常恨平生好古家。無力騎馬蹊田觀斷刻。中郎二字煩走驛。率更三日勞野食。長年囊楮况易擲。兒作摹朱婦遮壁。願從胡君丐。無有千百數。中聊取仿。胡君今逸民。盱眙不見十五春。坐令鉛塹老壯士。朝廷豈無憂國人。曩時豪氣今雖在。會面只謀千日醉。聽君汗漫馳古先。世事無何付蟬蛻。

酬李唐臣贈山水短軸李爲刑曹杜君章知賞

大山宮。小山霍。欲識山高觀石腳。大波爲瀾。小波爲淪。欲知水深觀水津。營邱於此意獨親。杜侯所與復有人。不見李侯今五載。苦向營邱有餘態。齊紈如雪吳刀裁。小毫束筍縑囊開。經營初似雲烟合。揮灑忽如風雨來。蒼梧泱泱天無日。深巖老樹洪濤入。榛林闌漠猿狄寒。苔蘚侵淫螺蚌濕。紛紛禽散江干沙。有風北來吹蒹葭。前洲后渚相隨沒。行子漁人歸徑失。李侯此筆良已奇。吾聞李侯家朔垂。跨河而北寧有之。曷不南遊觀禹穴。梅梁鑱澀萍滿皮。神物變化當若斯。元君畫史雖天與。我論絕藝無今古。張顛草書要劍舞。得意可無山水助。他日李侯人益慕。按爾雅大山宮。小山別。大山鮮。郭景純解宮爲圍繞。別爲不相連。此詩入手引用以宮字斷句。蓋偶誤耳。

芳儀怨事見陸遊避暑漫鈔

金陵宮殿春霏微。江南花發鷓鴣飛。風流國王家千口。十五吹簫粉黛稀。滿堂侍酒皆詞客。拭汗爭看平叔白。後庭一曲時事新。揮淚臨江悲去國。令公獻籍朝未央。敕書築第優降王。魏俘曾不輸織室。供奉一官奔武彊。秦淮潮水鍾山樹。塞北江南易懷土。雙燕清秋夢柏梁。吹落天涯猶並羽。相隨未是斷腸悲。黃

河應有卻還時。寧知翻手明朝事。咫尺人生不可期。蒼黃三鼓溁池岸。良人白馬今誰見。國亡家破一身存。薄命如雲信流轉。芳儀加我名字新。教歌遣舞不由人。採珠拾翠衣裳好。深紅退盡驚胡塵。陰山射虎邊風急。嘈雜琵琶酒闌泣。無言徧數天河星。只有南箕近鄉邑。當時千指渡江來。同苦不知身獨哀。中原骨肉又零落。寄詩黃鵠何當回。生男自有四方志。女子那知出門事。君不見李君椎髻泣窮邊。丈夫飄泊猶堪憐。

以承宴墨贈僧法

晁沖之

我聞江西墨官有諸奚。老超尙不如庭珪。後來承宴復秀出。喧然父子名相齊。百年相傳文斷碎。彷彿尙見蛟龍背。電光屬天星斗昏。雨痕倒海風雲晦。卻憶當年清暑殿。黃門侍立才人見。銀鈎洒落桃花牋。牙牀磨試紅絲研。同時書畫三萬軸。大徐小篆徐熙竹。御題四絕海內傳。秘府毫芒惜如玉。君不見建隆天子開國初。曹公受詔行掃除。王侯舊物人今得。更寫西天貝葉書。

卷三

七言古

離泗州有作

張耒

舸艤大艫來何州。翩翩五兩在船頭。淮邊落帆汴口宿。橋下連檣南與北。南來北去何時停。春水春風相送迎。沙岸飛鷗舊相見。短亭楊柳不無情。清歌一曲主人酒。主人壽客客舉手。明日酒醒船鼓鳴。沙邊破

墩不知名。行人十里一迴首。雲邊猶有塔亭亭。

牧牛兒

牧牛兒。遠陂牧。遠陂牧牛芳草綠。兒怒掉鞭牛不觸。澗邊柳古南風清。麥深蔽目田野平。烏犍礪角逐草行。老特臥。噉饑不鳴。犢兒跳梁沒草去。隔林應母時一聲。老翁念兒自攜餉。出門先上崗頭望。日斜風雨濕蓑衣。拍手唱歌尋伴歸。遠村放牧風日薄。近村牧牛泥水惡。珠璣燕趙兒不知。兒生但知牛背樂。

孫彥古畫風雨山水歌

山深巖高石壁青。白日忽變天晦冥。黑風驅雲走不停。驚電疾雨來如傾。山前雨點大如手。山下水湧危槎橫。崩崖古樹老有靈。吼怒直與風雲爭。枝披葉偃鬪不怯。萬竅卻欲藏雷霆。鞭驢疾驅者誰子。石路險澀驢凌兢。目迷心懼愈走愈不及。來憇樹下如寒蠅。蒼茫直與鬼神接。恍惚不保龍蛇驚。平居此景忽入眼。孫家古圖才可辨。奈何一幅一尺餘。欲奪天地之奇變。我心愛之良有以。昔苦山行親遇此。一生兩足不下堂。輸與朱門貴公子。

蕭朝散惠石本韓幹馬圖馬亡後足

世人怪韓生。畫馬身苦肥。幹寧忍不畫驥骨。當時廐馬君未知。開元太平國無事。戰馬卷甲飽不騎。玉關橐駝通萬里。長安第宅連諸姨。笙歌錦繡遍一國。六龍長閑空食粟。霜甜秋草沙苑遊。日暖春波渭川浴。雕圓腰穩目生光。細尾豐膺毛帖肉。珠鞍玉韉驕不行。豈有塵埃侵四足。韓生丹青寫天廐。磊落萬龍無一瘦。豈知車下骨如牆。飢齧草根刺傷口。君家古圖才半身。千里騰驥已有神。迴身側顧不無意。翦駿絡

頭嗟失真。君不見太宗戰馬拳腹毛。身騎此馬縛羣豪。龍虎精神金鼓氣。豈有閑地供脂膏。至今畫圖快胸臆。想見虯鬚親破賊。那知但愛廐中肥。漁陽筋脚蹄如石。神駒入水隨烟雲。蜀山石路無行人。六驥悲鳴足流血。騎驟遺事一酸辛。

送徐州舉人赴省試

李昭玘

淮夷之珠照夜明。泗濱之石聲泠泠。昔時大禹致方物。神光玉色羅廣庭。比年入獻多豪英。褒雄妙思相憑陵。飄飄束書去觀國。瘦馬踏雪鬚垂冰。長廊白晝天宇清。落筆冉冉風雲生。千官拱笏赭袍近。碧溝新柳黃鸝鳴。金搗虎士傳姓名。魚龍卷尾隨雷聲。州人洗眼望歸程。會約春風載酒迎。

題畫太乙真人

韓駒

太一真人蓮葉舟。脫巾露髮寒飈颼。輕風爲帆浪爲楫。臥看玉宇浮中流。中流蕩漾翠綃舞。穩如龍驤萬斛舉。不是峯頭十丈花。世間那有葉如許。龍眠畫手老入神。尺素幻出真天人。恍然坐我水仙府。蒼烟萬頃波粼粼。玉堂學士今劉向。禁直岩巖九天上。不須對此融心神。會植青藜夜相訪。

行路難

李彌遜

江心蟠石蒼虬立。山激江流浪頭急。風昏月暗魚龍愁。電掣雲奔鬼神入。舡頭星斗天爲低。夜潮生寒洲渚移。鳴舷鼓柁驚楚子。危檣遠纜號吳兒。篙師咄咄自相語。明朝扁舟繫何許。半月江行十日風。寸步家山隔秦楚。黃衫年少金雕鞍。日高華屋春夢殘。插花走馬咸陽道。世上空嗟行路難。

五禽言

周紫芝

雲穰穰。麥穗黃。婆餅欲焦新麥香。今年麥熟不敢嘗。斗量車載傾困倉。化作三軍馬上糧。婆餅焦。
山中流水聲聒聒。春禽說雨春泥滑。誰爲春禽語。莫報幽人明日雨。幽人明日欲上山。山雨雨足花爛斑。
泥滑滑。

提壺蘆樹頭。勸酒聲相呼。勸人沽酒無處沽。太歲何年當在酉。敲門問漿還得酒。田中禾穗處處黃。甕頭
新綠家家有。提壺蘆。

山花冥冥山欲雨。杜鵑聲酸客無語。客欲去。山邊賊營夜鳴鼓。誰言杜宇歸去樂。歸來處處無城郭。春日
暖。春雲薄。飛來日落還未落。春山相呼亦不惡。思歸樂。

田中水涓涓。布穀催種田。賊今在邑農在山。但願今年賊去蚤。春田處處無荒草。農夫呼婦出山來。深種
春秧答飛鳥。布穀。

遙碧軒作呈使君少隱時欲赴召

陳與義

我本山中人。尺一喚起趨埃塵。君爲邊城守。作意邀山入窗牖。朝來爽氣如有期。送我憑軒一杯酒。丈夫
已忍猿鶴羞。欲去且復斯須留。西峯木脫亂髮擁。東嶺烟破修眉浮。主人愛客山更好。醉裏一笑驚蠻州。
丁寧雲雨莫作厄。明日青山當逐客。

答林康民見和梅花詩

朱松

寒崦人家碧谿尾。一樹江梅臥清泚。仙姿不受凡眼汗。風斂天香瘴烟裏。向來休沐偶無事。誰從我遊二
三子。巒碣曲徑一攜手。凍雀驚飛亂萸委。班荆勸客小延佇。酌酒賦詩相料理。多情入骨憐風味。依倚橫

斜嚼冰蕊。至今清夢掛殘月。強作短歌傳素齒。韻高常恨句難稱。賴有君詩清且美。天涯歲晚感鄉物。歸歟何時路千里。柁樓一笛雪漫空。回首江臯淚如洗。

兼道攜古墨來墨面龍紋墨背識云保太元年奉勅造長春殿供御龍印香煤旁又識云墨務官臣庭珪監官臣夷中臣子和臣下等進蓋江南李氏物也感之爲作此詩 劉子鞏

長春殿古生荆蒼。猶有前朝遺物在。錦囊珍重出元圭。雙虬刻作蜿蜒態。枯皮剝裂弄幾刃。斷缺精堅磨不殺。吾聞李氏據江左。文采風流高一代。當時好玩不獨此。器用往往窮奢汰。徵工選技填御府。不惜千金爲賞賚。治兵唐推英衛精。治民漢許龔黃最。惜哉取士不知術。妙手獨得庭珪輩。真主驅馳八極中。荒王逸樂孤城內。汗青得失更誰論。尤物競爲人寶愛。嗟余視此真糞土。事有至微猶足戒。投文欲往弔江流。幽魂未泯應慚悔。

明覺山中始見梅花戲呈妙明老

王銓

急晷馳輪歲將歎。我更荒村轉冰轍。嚴凝萬物凍無姿。水墨陂塘葭葦折。是誰肯向此間來。破萼梅花伴幽絕。遙山堆恨天作愁。淡畫眉峯半明滅。清香自滿不因風。玉色素高非鬪雪。竹籬凝睇一淒涼。沙水澄鮮兩明潔。天仙謫自廣寒宮。定與桂娥新作別。尙憐孀獨各相望。多情與照黃昏月。從來耐冷月中人。一任北風吹石裂。漫營粉鏡學妝遲。欲寫冰膚畫工拙。千古無人識歲寒。獨有廣平心似鐵。我因花意拂埃塵。尙恐人傳向城闕。詩成火煖夜堂深。擁爐細與山僧說。

夜宴曲

范成大

金鱗噴香烟。龍蟠玉燈九枝青。闌干明瓊翠帶。湘簾斑風幃繡浪。千飛鸞舞娥紫袖如弓彎。雲中一笑天解顏。銜杯快卷玻璃乾。花樓促箭春宵寒。二十五聲宮點闌。

湖口夜泊南去零陵十里矣營水來自營道過零陵下湘水自桂林之海陽至此與營會合爲一江

我從清湘發源來。直送湘流入營水。故人亭前合江處。暮夜檣竿蠹沙尾。卻從湖口望湘南。城郭山川恍難紀。萬壑千巖詩不徧。惟有蒼苔痕屐齒。三年瘴霧亦奇絕。浮世登臨如此幾。湖南山色夾江來。無復瑤簫插天起。陂陀狼石蹲清漲。淡蕩光風浮白芷。騷人魂散若爲招。傷心極目春千里。我亦江南轉蓬客。白鳥愁烟思故壘。遠遊雖好不如歸。一聲鷓鴣花如洗。

照田蠶行

鄉村臘月二十五。長竿然炬照南畝。近似雲開森列星。遠如風起飄流螢。今春雨雹繭絲少。秋日雷鳴稻堆小。儂家今夜火最明的。知新歲田蠶好。夜闌風燄西復東。此占最吉餘難同。不惟桑賤穀芑芑。仍更苧麻無節菜無蟲。

風雨中望峽口諸山奇甚戲作短歌

陸游

白鹽赤甲天下雄。拔地突兀摩蒼穹。凜然猛士撫長劍。空有豪健無雍容。不令氣象少溇瀟。常恨天地無全功。今朝忽悟始歎息。妙處元在煙雨中。太陰殺氣橫慘淡。元化變態含空濛。正如奇材遇事見。平日乃與常人同。安得朱樓高百尺。看此疾雨吹橫風。

岳池農家

春深農家耕未足。原頭叱叱兩黃犢。泥融無塊水初渾。雨細有痕秧正綠。綠秧分時風日美。時乎未有差科起。買花西舍喜成婚。持酒東鄰賀生子。誰言農家不入時。小姑畫得城中眉。一雙素手無人識。空村相喚看繅絲。農家農家樂復樂。不比市朝爭奪惡。宦遊所得真幾何。我已三年廢東作。

長歌行

人生不作安期生。醉入東海騎長鯨。猶當出作李西平。手梟逆賊清舊京。金印煌煌未入手。白髮種種來無情。成都古寺臥秋晚。落日偏傍僧牕明。豈其馬上破賊手。哦詩長作寒螿鳴。興來買盡市橋酒。大車磊落堆長餅。哀絲豪竹助劇飲。如鉅野受黃河傾。平時一滴不入口。意氣頓使千人驚。國讐未報壯士老。匣中寶劍夜有聲。何當凱還宴將士。三更雪壓飛狐城。

龍挂

成都六月天大風。發屋動地聲勢雄。黑雲崔嵬行風中。凜如鬼神塞虛空。霹靂迸火射地紅。上帝有命起伏龍。龍尾不卷曳天東。壯哉雨點車軸同。山摧江溢路不通。連根拔出千尺松。未言爲人作年豐。偉觀一洗芥蒂胸。

大雪歌累日作雪竟不成戲賦此篇

長安城中三日雪。潼關道上行人絕。黃河鐵牛僵不動。承露金盤凍將折。虬鬚豪客狐白裘。夜來醉眠寶釵樓。五更未醒已上馬。衝雪卻作南山遊。千年老虎獵不得。一箭橫穿雪皆赤。擎空爭死作雷吼。震動山

林裂崖石。曳歸擁路。千人觀。憫體作枕皮。蒙鞍人間壯士。有如此。胡不來歸漢天子。

舟中對月

百壺載酒遊凌雲。醉中揮袖別故人。依依向我不忍別。誰似峨眉半輪月。月窺船牕挂凄冷。欲到渝州酒初醒。江空裊裊釣絲風。人靜翩翩葛巾影。哦詩不睡月滿船。清寒入骨我欲仙。人間更漏不到處。時有沙禽背船去。

懷成都十韻

放翁五十猶豪縱。錦城一覺繁華夢。竹葉春醪碧玉壺。桃花驥馬青絲鞵。鬪雞南市各分朋。射雉西郊常命中。壯士臂立綠條鷹。佳人袍畫金泥鳳。椽燭那知夜漏殘。銀貂不管晨霜重。一梢紅破海棠回。數蕊香新早梅動。酒徒詩社朝莫忙。日月匆匆迭賓送。浮世堪驚老已成。虛名自笑今何用。歸來山舍萬事空。臥聽槽牀酒鳴瓮。北牕風雨耿青燈。舊遊欲說無人共。

客談荆渚武昌慨然有作

去歲出蜀初東遊。峨眉大艫下荊州。便風轉頭五百里。吟嘯已在黃鶴樓。戲拈鐵笛吹出塞。水涵月落魚龍愁。明朝喧傳古仙過。碧玉帶束黃絁裘。豈知一官自桎梏。簿書期會無時休。豐城寶劍已化久。我自吐氣冲斗牛。洞庭四萬八千頃。蟹舍正對蘆花洲。速脫衣冠挂神武。散髮爛醉垂虹秋。

城西接待院後竹下作

水邊小邱因古城。上有巨竹數百箇。一徑蛇蟠不容腳。平處乃可十客坐。裊裊共看風枝舞。蔌蔌時聽春

籀墮古佛不粧香火冷。瘦僧如腊袈裟破。門前西去長安路。日夜軸轡銜尾過。老夫本乏臺省姿。且就清陰曲肱臥。

九月一日夜讀詩稿有感走筆作歌

我昔學詩未有得。殘餘未免從人乞。力孱氣餒心自知。妄取虛名有慚色。四十從戎駐南鄭。酣宴軍中夜連日。打毬築場一千步。閱馬列廐三萬疋。華燈縱博聲滿樓。寶釵豔舞光照席。琵琶絃急冰雹亂。羯鼓手勻風雨疾。詩家三昧忽見前。屈賈在眼元歷歷。天機雲錦用在我。翦裁妙處非刀尺。世間才傑固不乏。秋毫未合天地隔。放翁老死何足論。廣陵散絕還堪惜。

謝胡子遠郎中惠蒲太韶墨報以龍涎心字香

楊萬里

墨家者流老蒲仙。碧梧探花和麝烟。華陽黑水煎膠漆。太陰玄霜作肌骨。龍尾磨肌飲鼠鬚。落點髣几。几不如。夷甫清瞳光敵日。一見墨卿驚自失。後來夔州有梁杲。邇來黟川有吳老。亦追時好得時名。竟爲蒲生豎降旌。吳墨往往玄尚白。梁墨濕濕黏黏壁。南宮先生來自西。惠然贈我四玄圭。我無鵲返鸞回字。我無金章玉句子。得君此贈端何似。兀者得鞞僧得髭。安得玉案雙鳴璫。金刀繡段底物償。送以龍涎心字香。爲君興雲繞明牕。

送王監簿民瞻南歸

潮墮打雲雲不留。月波潑牕牕欲流。夜寒報晴豈待曉。天公端爲盧溪老。盧溪在山不知年。盧溪出山卽日還。黃紙苦催得高臥。青霞成癖誰能那。詔謂先生式國人。掉頭已復烟林深。路傍莫作兩疏看。老儒不

用橐中金。

題望韶亭

新隆寺後看韶石。三三兩兩各依稀。金坑津頭看韶石。十五五不整齊。一來望韶亭上看。九韶八音堆一案。金鐘大鏞浮水涯。玉瑟瑤琴倚天半。堯時文物也。簷疎禮樂猶帶鴻荒餘。茅茨殿上隄土鼓。葦籥聲外無笙竽。黃能郎君走川嶽。領取后夔搜禮樂。嶧山桐樹半夜鳴。泗水石頭清晝躍。山祇川后爭獻珍。姚家制作初一新。帝思南嶽來時巡。宮琛廟寶皆駿奔。曲江清徹碧瓊軟。海山孤尖翠屏展。天顏有喜后夔知。一奏雲韶供亞飯。帝登九嶷忘卻歸。不知斑盡湘笛枝。后夔一脛跛莫隨。坐委衆樂江之湄。儀鳳舞獸掃無迹。獨留一狻守其側。至今喚作獅子石。雨淋日炙爛不得。洞庭張樂已莓苔。健爲獲馨亦塵埃。不如九韶故無恙。夏擊尙可冬起雷。何時九秋霜月裏。來聽湘妃瑟聲美。曲終道是不見人。江上數峯是誰子。

芭蕉雨

芭蕉得雨便欣然。終夜作聲清更妍。細聲巧學蠅觸紙。大聲鏘若山落泉。三點五點俱可聽。萬籟不生秋夕靜。芭蕉自喜人自愁。不如西風收卻雨。卽休。

題興寧縣東文嶺瀑泉在夜明場驛之東

筍輿路轉崖欹傾。只聞滿山泉水鳴。卷書急開已半失。眼不停注耳細聽。石如鐵色黑。壁立鏡面平。水從鏡面一飛下。蘄笛織簾風漪生。石知水力倦。半壁鍾作玉一泓。水行到此欲小憩。後水忽至前水驚。分清裂白兩派出。跳珠躍出雙龍爭。不知落處深幾許。但聞井底碎玉聲。安得好事者。泉上作小亭。釀泉爲酒。

不用麴。春風吹作蒲萄綠。醉寫泉聲入枯木。何處更尋響泉曲。

遊蒲澗呈周帥蔡漕張船

勝日從公蒲澗遊。萬壑聲滿千崖秋。一徑如蛇三百曲。繞盡山腹到山頭。穹巖千仞敲欲裂。仰看飛泉瀉雲窟。鏘成環珮奏成琴。濺作珠璣霏作雪。步穿危磴攀蒼藤。忽上穹巖頂上行。人在半天泉在井。不敢下瞰。惟聞聲。只怪前驅深不見。須臾卻向前山轉。海風吹袖萬丈長。海水去人一弓遠。老僧高臥晏未興。先遣長松夾道迎。小參古殿黃面老。不見舊日安期生。景泰上方半堵壁。城中望之雪山白。卻從景泰望城中。曉日樓臺煥金碧。君不見中流千金博一壺。不如遊山飢時粥一盂。金印繫肘大如斗。不如遊山倦時一杯酒。安期飛昇今幾年。祖龍不是不求仙。至今年年七月二十五。傾城遊人來訪古。

郡圃無海棠買數根植之

王十朋

少陵詩史有遺闕。海棠名花輒湮沒。孤芳千載逢蘇仙。竹籬一笑嫣然發。我從蜀錦亭邊來。范文正公守鄆陽。種海棠於郡圃。名亭曰蜀錦。遙入蒼蒼烟雨窟。綺霞曉抹神女肌。香醪春醉明妃骨。鮮鮮絲蕊垂更弱。點點胭脂勻未歇。半含欲吐不勝情。沐露梳風睡明月。爲開樽酒苦多病。欲插一枝羞白髮。照眼千株未觀蜀。回首十年深憶越。往在會稽訪諸名園。海棠最盛。何人好事呼名友。姚魏不容矜閥閱。曾端伯十花詞。目海棠曰名友牡丹不與。凝香有地胡不植。負郭無園何處謁。不煩飛鵠銜子來。自買芳根帶花掘。明年高堂來燕子。想見繁紅映林樾。栽花老手在何許。鴈蕩山中採薇蕨。憑誰爲問花消息。有夢遙驚山突兀。自慚不是召伯棠。那得詩人歌不伐。

望夫山

陳造

亭亭碧山椒。依約凝黛立。何年蕩子婦。登此望行役。君行斷音信。妾恨無終極。堅誠不磨滅。化作山上石。烟悲復雲慘。髣髴見精魄。野花徒自好。江月爲誰白。亦知江南與江北。紅樓無處無傾國。妾身爲石良不惜。君心爲石那可得。

憶鄂渚

劉過

我離鄂渚已十年。吳兒越女空華鮮。不如上游古形勢。四十餘萬兵籌邊。中原地與荆襄近。烈士烈兮猛士猛。澤連雲夢寒打圍。城接武昌曉排陣。書生豈無一策奇。叩關擊鼓天不知。卻思仙人白玉笛。胡牀醉倚南樓吹。貂蟬兜鍪兩岑寂。若耶溪傍還作客。空餘黃鶴舊題詩。醉筆顛狂驚李白。

改周晉仙贈丁相士之什

敖陶孫

張顛許我以神仙。薛顛謂予可英傑。丁生謂二俱無成。世間那得此奇崛。麒麟閣上森貂蟬。龍虎鼎內飛大丹。腰錢跨鶴誰不願。只有圯下先我鞭。何如吳淞江上住。門橫釣車屋農具。臥看蒼虬擾白雲。正午堂堂拔江去。

采蓮曲

鄒登龍

平湖淼淼蓮風清。花開映日紅妝明。一雙鴻鴻忽飛去。爲驚花底蘭橈鳴。蘭橈蕩漾誰家女。雲妥髻鬟黛眉嫵。采采荷花滿袖香。花深忘卻來時路。

過平原作

文天祥

平原太守顏真卿。長安天子不知名。一朝漁陽動鼙鼓。大江以北無堅城。公家兄弟奮戈起。一十七郡連夏盟。賊聞失色分兵還。不敢長驅入咸京。明皇父子將西狩。由是靈武起義兵。唐家再造李郭力。若論牽制公威靈。哀哉常山慘鉤舌。心歸朝廷氣不攝。崎嶇坎坷不得志。出入四朝老忠節。當年幸脫安祿山。白首竟陷李希烈。希烈安能遽殺公。宰相盧杞欺日月。亂臣賊子歸何處。茫茫烟罩中原土。公死於今六百年。忠精赫赫雷當天。

烏棲曲擬張司業

謝翺

吳宮草深四五月。破楚門開烏啼歇。美人軍裝多在船。歸來把弓墮弓弦。越羅如粟越王獻。宮中養蠶不作線。轆轤出屋井水淺。梔樹花萎子如繭。烏栖烏啼宮燭秋。越女入宮吳女愁。

瓊花引

后土祠前車馬道。天人種花無瑤草。萼雲蕊珠欲上天。夜半黃門催進表。酒香浮春露泥泥。二十四橋色如洗。陰風吹雪月墮地。幾人不得揚州死。孤貞抱一不再識。夜歸闌風曉無蹟。蒼苔染根烟雨泣。歲久遊魂化爲碧。

逃暑崇法寺

城南古寺涼生處。草色遙連孝子墓。碁局雨生苔蘚文。袈裟晴挂芭蕉樹。自昔闍黎修白業。會公唯與舒王接。只今塵土影堂空。石上猶鐫麻紙帖。

賦得北府酒

北府酒吹濕宮城柳。柳枝着地春垂垂。祗管人間新別離。離情欲斷江水語。女兒連臂歌白紵。淮南神仙來酒坊。甲馬獵獵羽林郎。百年風物烟塵蒼。老兵對月猶舉觴。青帘淚濕女牆下。曾識行軍舊司馬。

送袁太初歸剡原袁來杭宿傳法寺寺在德壽宮北今行路及園卽宮舊址

大雷山下鄞江口。石濕落星海涵斗。莓苔鎖窗居鬼神。散髮天衣夜行酒。百年綺語墮凡塵。劉公不還謝公走。祇今零落三秋霜。猶說先朝人物藪。道逢袁君美年少。欲挽吳潮歸兩袖。自言學出戴君門。又說舒君忘年友。舒君白頭爪塵垢。戴君業成衣露肘。君來何處覓知音。弔古淒涼無老叟。出門擇語歸計餐。顧忌慚皇無不有。不如歸食空江槎。初生淡菜如珠母。風帆送客來夷洲。白恰青衫談不朽。君不見君今宿寺多。鄞僧耆舊能言幾。人在隔牆食柏秋。麝過廢石坡。隋舊南內。

賦得建業水

建業水。秋風動揚子。魚龍夜落星斗南。潮沒潮生蒼鶻起。他年冠蓋物具美。風吹小船入城市。潮去不來風日死。白浪黃塵烟霧裏。中有長魚食鱸鮓。解后食魚何處是。西上國門望武昌。風雨徙魚來漢陽。武昌魚勞聚寒慘。太白入月魚腦滅。武昌城頭鼓統統。

卷四

五言律

春日登樓懷歸

寇準

高樓聊引望。杳杳一川平。野水無人渡。孤舟盡日橫。荒村生斷靄。古寺語流鶯。舊業遙清渭。沉思忽自驚。

縣齋秋夕

張詠

才薄難勝任。空消懶惰情。公堂羣吏散。苔地亂蛩聲。隔歲鄉書絕。新寒酒病生。方今聖明代。不敢話辭榮。

寒食

王禹偁

寒食江都郡。青旗賣楚醪。樓臺藏綠柳。籬落露紅桃。妓女穿輕屐。笙歌泛小舸。使君慵不出。愁坐讀離騷。

五更睡

數載直承明。寵深還若驚。趁朝雞喚起。殘夢馬馱行。左宦離雙闕。高眠盡五更。如將閑比貴。此味敵公卿。

再遊海雲寺作

宋祁

十里雲邊寺。重驅千騎來。天形欹野盡。江勢讓山回。園柰濃成幄。樓鐘近殷雷。斜陽歸鞅促。飛蓋冒輕埃。

臘後晚望

寒日繫難定。鳴笳弄已休。凍崖初辨馬。昏谷自量牛。漢樹臨關密。胡泉入塞流。登高能賦未。風物古堯州。

城隅晚意

寥寥天意晚。稍覺井閭閒。水落呈全嶼。雲生失半山。牛羊樵路暗。燈火客舟還。暝思輸鳧鵠。歸飛沆澣間。

中秋新霽壕水初滿自城東隅泛舟回謝公命賦

齋舫譚經後。官池載酒行。斜陽鳥外落。新月樹端生。演漾思江浦。夷猶遶郡城。東轅有遺恨。日日物華清。

集江濱池

飛檻枕溪光。歡言客徧觴。暫雲消樹影。驟雨發荷香。辛白橙齋熟。庖刀鱠縷長。蘋風如有意。盈衽借浮涼。

過故關

韓琦

春入并州路。羣芳夾故關。前驕驅弩過。別境荷戈還。古戍餘荒堞。新耕入亂山。時平民自適。白首樂農閑。

華月

文彥博

皎皎新秋月。分明照洞房。幾人千里別。今夜九迴腸。皓彩穿珠幌。澄輝上璧璫。畫樓兼繡戶。渾是可憐光。

春曉

宿靄藏飛觀。晨霞晃繡甍。錦幃人未起。珠樹鵲先驚。爐煖香初燼。牕幽燭尙明。更開花上露。妝淚鬪盈盈。

晚至松門僧舍懷寄李太祝

余靖

日暮倦行役。解鞍初息肩。霧昏臨水寺。風勁欲霜天。蓼浦初聞鴈。人家半在船。思君正惘悵。黃葉更翩翩。

雨後獨行洛北

歐陽修

北闕望南山。明嵐雜紫烟。歸雲向嵩嶺。殘雨過伊川。樹繞芳堤外。橋橫落照前。依依半荒苑。行處獨聞蟬。

又行次作

秋色滿郊原。人行禾黍間。雉飛橫斷澗。燒響入空山。野水蒼烟起。平林夕鳥還。嵩嵐久不見。寒碧更孱顏。

離彭婆值雨投臨汝驛四寄張九屯田司錄

投館野花邊。羸驂晚不前。山橋斷行路。溪雨漲春田。樹冷無棲鳥。村深起暮烟。洛陽山已盡。休更望伊川。

和遊午橋莊

曉壇初畢祀，弭蓋共尋幽。鳥嘒林中出，泉聲冰下流。攀條驚雪盡，翻袂愛風柔。好駐城南馬，春桑徧陌頭。

伊川獨遊

綠樹繞伊川，人行亂石間。寒雲依晚日，白鳥向青山。路轉香林出，僧歸野渡閑。巖阿誰可訪，興盡復空還。

和解生中秋月

蘇舜欽

不爲人間意，居然節物清。銀塘通夜白，金餅隔林明。醉客樽前倒，棲鳥露下驚。悲歡古今事，寂寞墮荒城。

獨遊輞川

行穿翠靄中，絕磴落疎鐘。數里踏亂石，一川環碧峯。暗林麋養角，當路虎留蹤。隱逸何曾見，孤吟對古松。

依韻和子聰見寄

梅堯臣

嘗念餞行舟，風蟬動去愁。獨登孤岸立，不見遠帆收。及送故人盡，亦嗟歸迹留。洛陽君更憶，寧復醉危樓。

夢後寄歐陽永叔

不趁常參久，安眠向舊溪。五更千里夢，殘月一城雞。適往言猶是，浮生理可齊。山王今已貴，肯聽竹禽啼。

餘姚陳寺丞

試邑來句越，風烟復上游。江潮自迎客，山月亦隨舟。海貨通閩市，漁歌入縣樓。絃琴無外事，坐見浦帆收。

夏日晚霽與崔子登周襄故城

雨腳收不盡，斜陽半古城。獨攜幽客步，閑閱老農耕。寶氣無人發，陰蟲入夜鳴。余非避喧者，坐愛遠風清。

金山寺

吳客獨來後楚燒歸夕曛山形無地接寺界與波分巢鶻寧窺物馴鷗自作羣東小峯謂之鷗山有海鷗
雄雌棲其上每歲生雛羽翮既成與之縱飛迷而後返有年矣惡禽猛鷲不敢來茲以搏魚鳥老僧忘歲
月石上看江雲

秋晴西樓

劉敞

清風卷陰翳廣野見秋毫木落山覺瘦雨晴天似高開牕置尊酒看月湧江濤高臥淹湖海非關氣獨豪

觀魚臺

落日含古意高臺多遠心魚龍潛凍水蟋蟀有哀音江漢南浮遠關山北望深張衡四愁意歷歷起登臨

梅花

澤國春還蚤山梅臘競花繽紛迷雪意浩蕩逼年華驛使紅塵遠江風短日斜芳菲恐易失愁思亂悲笳

春陰

江上浮雲聚城中暮景兼東風酒味溢小雨客愁添寒色端侵牖斜陽不滿簾滯留成楚老卑濕意無嫌

月夜

月出浮雲盡風生中夜清星辰競搖動河漢湛虛明老樹稀疎影驚禽斷續聲秋懷先已亂蟋蟀更宵征

蟬

微軀定誰恨清嘯不知勞屈宋悲秋苦夷齊臥隱高風林含咽絕露葉動蕭騷何必催搖落人今已二毛

臨雨亭

秋至感人思。登臨成惘然。浮雲帝鄉外。落日古城邊。歸燕聲相別。幽花色可憐。名山負獨往。觸物見年年。

獨行

南山半雲雨。天氣雜暄寒。野興宜獨往。春愁無定端。鳥聲來靜聽。柳色入遙看。卻謝芳尊酒。悠悠誰與歡。

檀州

窮谷迴看盡。孤城平望遙。自古北口山至此。都盡市聲衙日集。此州衙日市集。海蓋午時消。每旦海氣如霧。至午消盡。土人謂之海蓋。冠帶才通漢。山川更入遼。春風解冰雪。最覺馬蹄驕。

遊大林

周子

三月山房暖。林花互照明。路盤層頂上。人在半空行。水色雲含白。禽聲谷應清。天風拂襟袂。縹緲覺身輕。

送峽州陳廉祕丞

司馬光

地險三巴口。江流百折蟠。騶珂通峽響。門戟照秋寒。翠壁虎牙石。素花狼尾灘。孫劉置柵處。細爲寫圖看。

送鄭推官戡赴邠州

形便邠公國。旌旗擁將壇。秦雲低落日。塞樹怯春寒。草檄無留思。投壺不廢歡。還應笑黃卷。寂寂守儒官。

郭氏園送張仲通出刺棣州

百榼行春樂。千弓從獵豪。苦吟邊月冷。飛鏑野風高。奇策鞭殊俗。長纓繫不毛。輸君躍馬貴。一等著青袍。

半山春晚卽事

王安石

名園送嘉客。冠蓋去傾朝。小雨塵微斂。餘寒酒易消。鴈歸春近塞。日上海生潮。北道平如掌。東風五馬驕。

春風取花去。酬我以清陰。翳翳陂路靜。交交園屋深。牀敷每小息。杖屨或幽尋。惟有北山鳥。經過遺好音。

卽事

徑暖草如積。山晴花更繁。縱橫一川水。高下數家村。靜憩雞鳴午。荒尋犬吠昏。歸來向人說。疑是武陵源。

欲歸

水漾青天暖。沙吹白日陰。塞垣春錯莫。行路老侵尋。綠稍還幽草。紅應動故林。留連一杯酒。滿眼欲歸心。

宿雨

綠攪寒蕪出。紅爭暖樹歸。魚吹塘水動。鴈拂塞垣飛。宿雨驚沙盡。晴雲晝漏稀。卻愁春夢短。燈火著征衣。

江亭晚眺

日下崦嵫外。秋生沆碭間。清江無限好。白鳥不勝閒。雨過雲收嶺。天空月上灣。歸鞍侵調角。回首六朝山。

陳公廡園修禊事席上賦

程伯子

盛集蘭亭舊。風流洛社今。坐中無俗客。水曲有清音。香篆來還去。花枝泛復沉。未須愁日暮。天際是輕陰。

凝雲榭晚興

文同

晚策倚危榭。羣峯天際橫。雲陰下斜谷。雨勢落褒城。遠渡孤烟起。前村夕照明。遙懷寄新月。又見一稜生。

荊州

蘇軾

游人出三峽。楚地盡平川。北客隨南賈。吳檣間蜀船。江侵平野斷。風卷白沙旋。欲問興亡意。重城自古堅。朱檻城東角。高王此望沙。江山非一國。烽火畏三巴。戰骨淪秋草。危樓倚斷霞。百年豪傑盡。擾擾見魚蝦。

遊鶴林招隱

郊原雨初霽。春物有餘妍。古寺滿修竹。深林聞杜鵑。睡餘柳花墮。目眩山櫻然。西牕有病客。危坐看香烟。

新年

曉雨暗人日。春愁連上元。水生挑菜渚。烟濕落梅村。小市人歸盡。孤舟鶴踏翻。猶堪慰寂寞。漁火亂黃昏。

秦淮夜泊

賀鑄

官柳動春條。秦淮生暮潮。樓臺見新月。燈火上雙橋。隔岸開朱箔。臨風弄紫簫。誰憐遠遊子。心旌正搖搖。

登烏江柏子岡懷景仁

驅車柏子岡。引首東南望。孤戍帶寒日。長江流大荒。故人越五嶺。旅鴈留三湘。好待春風暖。相隨還北鄉。

江夏遇興

風與檣鳥便。儂先塞鴈來。山經七澤斷。潮自九江回。漁父猶知隱。騷人枉銜才。朋從正相遠。梅信爲誰開。

呻吟齋睡起

黃庭堅

棐几坐清晝。博山凝妙香。蘭芽依客土。柳色過鄰牆。巷僻過從少。官閑氣味長。江南一枕夢。高臥聽鳴榔。

建平途次

張耒

野橋田徑滑。官路柳條新。流水伴遲日。野花留晚春。點空知去翼。衝綠有歸人。自笑諳岐路。無勞更問津。

宿濟河

陳師道

燭暗人初寂。寒生夜向深。潛魚聚沙窟。墜鳥滑霜林。稍作他年計。初回萬里心。還家只有夢。更著曉寒侵。

遊鶴山院

積石橫成嶺。行楊密映門。人聲隱林杪。僧舍透雲根。頓攝塵緣盡。方知象教尊。只應羊叔子。名字與山存。
南豐先生出守日常遊是院。

寓目

曲曲河回復。青青草接連。去帆風力滿。來鴈一聲先。野曠低歸鳥。江平進晚牽。望鄉從此始。留眼未須穿。

道中書懷

李昭玘

平野青蕪合。長橋綠樹低。客愁須白酒。春意屬黃鸝。落日鄉關遠。孤邨烟水迷。清明能幾日。卻過浙江西。

除夕

唐庚

患難思年改。龍鍾惜歲徂。關河先壘遠。天地小臣孤。吾道憑溫酒。時晴付擁爐。南荒足妖怪。此日謾桃符。

己酉亂後寄常州使君姪

汪藻

汾水遊仍遠。瑤池宴未歸。航遷羣廟主。矢及近臣衣。戎馬窺天塹。邊烽斷日畿。百年淮海地。回首復成非。
草草官軍渡。悠悠敵騎旋。方嘗句踐膽。已補女媧天。諸將爭陰拱。蒼生忍倒懸。乾坤滿羣盜。何日是歸年。
身老今何向。兵拏未肯休。經旬甘半菽。盡室委扁舟。台折星猶彗。農飢麥未收。日邊無一使。兒女詎知愁。
春到花仍笑。時危特自哀。平城隆準去。瓜步佛狸來。地下皆冤肉。人間半劫灰。只今衰淚眼。那得向君開。

春事

孫覲

茆棟依林出。松扉傍水斜。浮蒼圍百疊。亂綠翳三叉。屋破蝸書壁。庭蕪鶴印沙。小桃供一笑。已著兩三花。

贈蕭光祖

周孚

之子固絕俗。少年甘寂寥。田園一蚊睫。書卷百牛腰。雪徑晴猶凍。烟江晚不潮。箇中勤著語。老耳欲聞韶。

元日懷陳道人并憶焦山舊遊

故人應白髮。今我尙華顛。舊約鷗能記。新詩鴈不傳。功名畫地餅。歲月下江船。回首留題處。淒涼已去年。

雨過

周紫芝

池面過小雨。樹腰生夕陽。雲分一山翠。風與數荷香。素月自有約。綠瓜初可嘗。鷓鴣莫飛去。留此伴新涼。

辰州上元

王庭珪

留滯遠湘浦。飄如雲水僧。來爲萬里客。又看一年燈。翠幃裹珠箔。高樓俯玉繩。鰲山今夜月。應上最高層。

九日晨起

呂本中

漸歇敲蚊手。眞成把酒天。長河印曉月。老木聚荒烟。了了江山夢。區區文字緣。南塔兩三菊。極意作今年。

道中寒食

陳與義

斗粟淹吾駕。浮雲笑此生。有詩酬歲月。無夢到功名。客裏逢歸鴈。愁邊有亂鶯。楊花不解事。更作倚風輕。

寒食

草草隨時事。蕭蕭傍水門。濃陰花照野。寒食柳圍村。客袂空佳節。鶯聲忽故園。不知何處笛。吹恨滿清尊。

岸幘

岸幘立清曉。山頭生薄陰。亂雲交翠壁。細雨濕青林。時改客心動。鳥鳴春意深。窮鄉百不理。時得一閒吟。

雨

霏霏三日雨。靄靄一園春。霧澤含元氣。風花過洞庭。地偏寒浩蕩。春半客嶢峴。多少人間事。天涯醉又醒。

晚步

賦畝意不適。出門聊散憂。雨餘山欲近。春半水爭流。衆籟夕還作。孤懷行轉幽。溪西篁竹亂。微徑雜歸牛。

放慵

暖日薰楊柳。濃春醉海棠。放慵真有味。應俗苦相妨。官拙從人笑。交疎得自藏。雲移穩扶杖。燕坐獨焚香。

金潭道中

晴路輿與穩。舉頭閑望賒。前崗春泱泱。後嶺雪槎牙。海內兵猶壯。村邊歲自華。客行驚節序。回眼送桃花。

途中寒食

曹 勛

上已當羈旅。飄然浙水東。好花閑照水。宿雨冷連空。靈武兵方振。燕然信未通。無人訪老子。有淚濕春紅。

出郊

劉子翬

路轉囊山北。扶輿憶舊過。乾坤征戰久。游宦別離多。瘴樹餘紅葉。春江又綠波。平生豪橫氣。未老半消磨。

初入巫峽

范成大

鑽火巴東岸。樅金峽口船。東江崖欲合。漱石水多旋。卓午三竿日。中間一罅天。偉哉神禹跡。疏鑿此山川。

將至石湖道中書事

水綠鷗邊漲。天青鴈外晴。柳堤隨草遠。麥隴帶桑平。白道吳新郭。蒼烟越故城。稍聞雞犬鬧。僮僕想來迎。

春晚卽事留游子明王仲明

繡地紅千點。平橋綠一篙。棟花來石首。穀雨熟櫻桃。笑我生塵甑。慚君有敝袍。故人能少駐。門徑久蓬蒿。

寄張眞父舍人

陸游

諸公方袞袞。無地著斯人。萬里夔州守。中朝禁省臣。孤帆秋上峽。五馬曉班春。想見懷明主。登臨白髮新。

小出塞曲

全師出鴈塞。百戰運龍韜。金絡洮州馬。珠裝夏國刀。度沙風破肉。攻壘雪平壕。明日受降處。甲齊熊耳高。

小舟遊西涇度西岡而歸

小雨重三後。餘寒百五前。聊乘瓜蔓水。閒泛木蘭船。雪暗梨千樹。烟迷柳一川。西岡夕陽路。不到又經年。

和周仲覺

楊萬里

月淡猶明樹。霜嚴不剩雲。天寒一鴈叫。夜半幾人聞。詩只令吾瘦。清聊與子分。頻來仍恨少。此去更離羣。

和仲良春晚卽事

欲與東風說。休吹墮絮飛。吾行正無定。魂夢豈忘歸。花暖能醺眼。山濃欲染衣。只嫌春已老。此景也應稀。

明發新塗晴快風順約泊樟鎮

雨到中宵歇。心知逗曉晴。排雲數峯出。漏日半江明。風借輕帆便。天催嬾客行。不應樟鎮酒。無意待人傾。

虞丞相挽詞

負荷偏宜重。經綸別有源。雪山眞將相。赤壁再乾坤。奄忽人千古。淒涼月一痕。世無生仲達。好手未須論。

保奭方爲左，希文自請西。不勞三尺劍，已辦一丸泥。已矣歸黃壤，傷哉夢白雞。清風雅作誦，何石不天齊。
一老堂堂日，諸賢得得來。但令元氣壯，不慮塞塵開。名大天難着，人亡首忍回。東風好西去，吹淚到泉臺。

宿蘭溪水驛前

合眼波吹枕，開篷月入船。奇哉一江水，寫此二更天。剩欲酣清賞，翻愁敗醉眠。今宵懷昨夕，兩臥萬峯前。

過張王廟

地迴人烟寂，山盤水勢回。怪松欹岸出，古廟背河開。晚色催征棹，斜陽戀去梳。丹徒誰道遠，一眺正悠哉。

登定王臺

朱子

寂寞番君後，光華帝子來。千年餘故國，萬事只空臺。日月東西見，湖山表裏開。從知爽鳩樂，莫作雍門哀。
奉陪判院丈充父平父兄宿回向用知郡丈壁間舊題之韻

暮雨停驂處，僧廬古道邊。千峯環傑閣，一水下平田。行役無期度，經過幾歲年。明朝須飽飯，躡足上寒烟。

題福巖

張栻

擲鉢峯前寺，肩輿幾度來。樓臺還舊觀，杉檜撫新栽。湘水堂堂去，秋山面面開。裴徊千古思，風壑有餘哀。

宿大冶縣

王十朋

隔岸呼舟子，湖山日欲曛。人家數點火，風物一川雲。小渡漁人占，中流縣界分。秋深山驛冷，蕭瑟夜深聞。

過三叉

派別從金口，江行過玉沙。風灣迂入壘，烟渚會三叉。柳老餘春色，尊空負月華。端如退之語，江遠共蒹葭。

山居

陳造

鳥息我亦倦，行行取徑微。石稜妨錯足，藤蔓每鈎衣。森木各天籟，連山同夕暉。推門吟袖冷，滿帶野風歸。

桐柏觀

趙師秀

山深地忽平，縹緲見殊庭。瀑近春風濕，松多曉日青。石壇遺鶴羽，粉壁剝龍形。道士王靈寶，輕強滿百齡。

巖居僧

開扉在石層，盡日少人登。一鳥過寒木，數花搖翠藤。茗煎冰下水，香炷佛前燈。吾亦逃名者，何因似此僧。

大慈道

青苔生滿路，人迹至應稀。小寺鳴鐘晚，深林透日微。野花春後發，山鳥澗中飛。或有相逢者，多因採藥歸。

送薛子舒赴華亭船官

翁卷

君到雲間日，應分二陸名。縣圖山色少，井味海潮并。剡局三年印，春風半月程。野人因買鶴，曾向此中行。

宿翁靈舒幽居期趙紫芝不至

徐照

江城過一宿，秋氣入宵濃。蛩響移砧石，螢光入瓦松。月遲將近曉，角盡卽聞鐘。人起行庭際，思君恨幾重。

黃碧

徐璣

黃碧平沙岸，陂塘柳色春。水清知酒好，山瘦識民窮。雞犬田家靜，桑麻歲事新。相逢行路客，半是永嘉人。

憑高

憑高散幽策，綠草滿春坡。楚野無林木，湘山似水波。客懷隨地改，詩思出門多。尙有溪西寺，斜陽未得過。

春日遊張提舉園池

西野芳菲路。春風正可尋。山城依曲渚。古渡入修林。長日多飛絮。遊人愛綠陰。晚來歌吹起。惟覺畫堂深。

常熟縣破山寺

高翥

古縣滄浪外。精藍縹緲間。木枯曾閱世。龍老解分山。鳥道秋迷迹。禪房晝掩關。詩成遊子去。流水自潺潺。

野興

嚴粲

身閑歸未得。野興日翛然。抱牘無來吏。尋詩卽散仙。杯明松罅月。坐引石根泉。有客知余意。清風三兩絃。

桐廬道中

姚鏞

兩岸山如簇。中流鑿翠微。風帆逆水上。江鶴背人飛。野廟青楓樹。人家白板扉。嚴陵臺下過。不敢浣塵衣。

泊歙浦

方岳

此路難爲別。丹楓似去年。人行秋色裏。鴈落客愁邊。霜月歆寒渚。江聲驚夜船。孤城吹角處。獨立渺風烟。

咏梅

張道洽

村墅苔爲徑。茅檐竹作籬。神清和月寫。香遠隔烟知。老樹有餘韻。別花無此姿。詩人風味似。夢寐也應思。

野望

周弼

春日晚荒荒。平沙極渺茫。樓敲三面水。城臥數條岡。白草吳京甸。黃桑楚戰場。長江俱不問。一片瀉斜陽。

暮登蓬萊閣

陳鑒之

危欄散溼鬱。已暮亦登臨。鼓角孤城月。山川萬古心。鶴棲松霧重。鷗臥渚烟深。客子終何託。婆婆且醉吟。

宿台州城外

林景熙

荒驛丹邱路。秋高酒易醒。霜增孤月白。江截亂峯青。旅鴈如曾識。哀猿不可聽。到家追此夕。三十五郵亭。

卷五

七言律

禁林春直

李昉

疎簾搖曳日輝輝。直閣深嚴半掩扉。一院有花春晝永。八方無事詔書稀。樹頭百轉鶯鶯語。梁上新來燕燕飛。豈合此身歸此地。妨賢尸祿自知非。

京口江際弄水

徐鉉

退公求靜獨臨川。揚子江南二月天。百尺翠屏甘露閣。數帆晴日海門船。波澄瀨石寒如玉。草接汀蘋綠似烟。安得乘槎更東去。十洲風外弄潺湲。

送郝郎中爲浙西判官

大藩從事本優賢。幕府仍當北固前。花繞樓臺山倚郭。寺臨江海水連天。恐君到卽忘歸日。憶我遊曾歷二年。若許他時作閑伴。殷勤爲買釣魚船。

舟中晚望桃源山

張詠

仙山初指眼初明。倚棹因妨半日程。雲裏未庸迷去路。世間爭合有浮名。崑空閣老松千尺。天靜時聞鶴

一聲更謝暮霞憐。惜別滿坡紅影照嶙峋。

寒食

王禹偁

今年寒食在西山。山裏風光亦可憐。稚子就花拈蛺蝶。人家依樹繫鞦韆。郊原曉綠初經雨。巷陌春陰乍禁烟。副使官閑莫惆悵。酒錢猶有撰碑錢。

日長簡仲咸

日長何計到黃昏。郡僻官閑晝掩門。子美集開詩世界。伯陽書見道根源。風騷北院花千片。月上東樓酒一樽。不是同年來主郡。此心牢落共誰論。

寄獻潤州趙舍人

南徐城古樹蒼蒼。衙府樓臺盡枕江。甘露鐘聲清醉榻。海門山色滴吟牕。直廬久負題紅藥。出鎮何妨擁碧幢。聞說秋來自高尚。道裝筇竹鶴成雙。

送羅著作奉使湖湘

使星躔次入長沙。曉別延英去路賒。數刻漏中承密旨。幾重湖外奉皇華。山行馬拂湘川石。寺宿僧供嶽麓茶。迴日期君直西掖。當階紅藥正開花。

新秋卽事

宦途流落似長沙。賴有詩情遣歲華。吟弄淺波臨釣渚。醉披殘照入僧家。石挨苦竹旁抽筍。雨打戎葵臥放花。安得君恩許歸去。東陵閑種一園瓜。

寄題義門胡氏華林書院

水閣山齋架碧虛。亭亭華表映門闕。力田歲取千箱稻。好事家藏萬卷書。旋對杯盤燒野筍。別開池沼養溪魚。吾生未有林泉計。空媿妨賢臥直廬。

上李昉相公

王操

弱冠登龍入粉闈。少年清貴古來稀。袖中詔草朝天去。頭上宮花侍宴歸。卓筆玉堂寒漏迴。捲簾池館水禽飛。三台位近猶多遜。閑聽秋霖憶翠微。

梁舍人奉使巴中

楊億

藥署深嚴纔草詔。劍關迢遞忽乘輅。霜天歷歷巴猿苦。山路駸駸笮馬驕。梁苑寒風吹別袂。瞿塘春水送歸橈。紫垣遣使非常例。應有星文動九霄。

成都

五丁力盡蜀山通。千古成都綠酎醲。白帝倉空蛙在井。青天路險劍爲峯。漫傳西漢祠神馬。已見南陽起臥龍。張載勒銘堪作戒。莫矜函谷一九封。

梨

繁花如雪蚤傷春。千樹封侯未是貧。漢苑漫傳盧橘賦。驪山誰識荔枝塵。九秋青女霜添味。五夜方諸月溜津。楚客狂醒朝已解。水風猶自獵汀蘋。

寄靈仙觀舒職方學士

綠髮郎潛不記年。卻尋丹竈味靈篇。華陰學霧還成市。彭澤橫琴豈要絃。曉案祇應餐沆瀣。夜灘誰見弄潺湲。須知吏隱金門客。待乞刀圭作地仙。

寄靈仙觀舒職方學士

錢惟演

方瞳玄髮粉闌郎。絳闕齋心奉紫皇。徵士高懷雲在嶺。騷人秋思水周堂。閑園露草開三徑。靈宇華燈燭九光。知有美田堪種玉。幾時春渚逐歸航。

公舍春日

丁謂

綠楊垂線草鋪茵。觸處烟光舉眼新。一品也須妨白髮。千金莫惜買青春。鶯聲圓滑堪清耳。花豔鮮明欲照身。獨向此時爲俗吏。風流知是不如人。

燈

穆修

杳杳有時當永恨。依依何處照閑眠。靜臨客枕愁寒雨。遠逐魚篷耿暝烟。纖影乍欹還自立。冷花時結不成圓。銷魂猶憶江樓夜。曾對離觴賦短篇。

西湖春日

林逋

爭得才如杜牧之。試來湖上輒題詩。春烟寺院敲茶鼓。夕照樓臺卓酒旗。濃吐雜芳薰蠟燭。濕飛雙翠破漣漪。人間幸有蓑兼笠。且上漁舟作釣師。

山園小梅

衆芳搖落獨暄妍。占盡風情向小園。疎影橫斜水清淺。暗香浮動月黃昏。霜禽欲下先偷眼。粉蝶如知合

斷魂幸有微吟可相狎。不須檀板共金尊。

梅花

吟懷長恨負芳時。爲見梅花輒入詩。雪後園林纔半樹。水邊籬落忽橫枝。人憐紅豔多應俗。天與清香似有私。堪笑胡雛亦風味。解將聲調角中吹。

寒食

宋 祁

九門烟樹蔽春塵。小雨初晴潑火前。草色引開盤馬地。簫聲催暖賣餠天。縈絲蚤絮輕無著。弄袖和風細可憐。鼇署侍臣貪出沐。珉麈珠餠愧頒宣。

落花

墜素翻紅各自傷。青樓烟雨忍相忘。將飛更作迴風舞。已落猶成半面妝。滄海客歸珠迸淚。章臺人去骨遺香。可能無意傳雙蝶。盡付芳心與蜜房。

將到都先獻樞密太尉相公

再試州旗驗不才。卻將憔悴到中臺。相車問罷同牛喘。大廈成時與燕來。今日謀猷須丙魏。他年賓客但鄒枚。西園聞道餘春在。尙及花前滌盃。

擬杜子美峽中意

天入虛樓倚百層。四方遙謝此登臨。驚風借壑爲寒籟。落日容雲作暝陰。峴井北拋王粲宅。楚衣南逐女嬃砧。十年不識長安道。九籥宸開紫氣深。

集西園

日日西園春思催。攜觴結客上高臺。正緣從事青州至。更喜書生洛下來。時州醞既美。又命座客賦詩。蚤
葉已成花半落。新巢未定燕千回。芳辰物物皆堪愛。併作南陽倒載媒。

示張寺丞王校勘

晏殊

元已清明假未開。小園幽徑獨徘徊。春寒不定斑斑雨。宿醉難禁滌滌杯。無可奈何花落去。似曾相識燕
歸來。遊梁賦客多風味。莫惜青錢萬選才。

寓意

油壁香車不再逢。峽雲無迹任西東。梨花院落溶溶月。柳絮池塘淡淡風。幾日寂寥傷酒後。一番蕭索禁
烟中。魚書欲寄何由達。水遠山長處處同。

奉和御製上元觀燈

夏竦

魚龍曼衍六街呈。金鎖通宵啓玉京。冉冉遊塵生輦道。遲遲春箭入歌聲。寶坊月魄龍燈淡。紫館風微鶴
燄平。宴罷南端天欲曉。迴瞻河漢尚盈盈。

登廣教院閣

韓琦

岑寂禪扉啓畫關。公餘爲會一開顏。高臺面壘包平野。老柏參天礙遠山。花去春叢蝴蝶亂。雨勻朝圃桔
槔閑。徘徊軒檻何時下。直待前枝倦鵲還。

次韻和子淵學士春雨

天幕沉沉淑氣溫。雨絲輕軟墜雲根。洗開春色無多潤。染盡花光不見痕。寂寞畫樓和夢鎖。依微芳樹過人昏。堂虛座密珠簾下。試問淳于醉幾樽。

招仲通司封府園避暑

文彥博

騎山樓下水軒東。一室初開待白公。白云奇章欲於南溪上。別葺一室與白傅止宿。故詩云終恐不如南澗上。別開一室待閑人。雖是不如南澗上。都緣卻有北牕風。銜杯避暑稱河朔。飛蓋延賓在鄴中。解榻況逢徐孺子。饋漿茹飯與君同。

初入峽

趙抃

峽江初過三遊洞。天氣新調二月風。樵戶人家隨處見。仙源雲路有時通。峯巒壓岸東西碧。桃李臨波上下紅。險磧惡灘各幾許。晚停征棹問漁翁。

三日赴宴口占

歐陽修

賜宴初逢禊節佳。昆池新漲碧無涯。九門寒食多遊騎。三月春陰正養花。共喜流觴修故事。自憐霜鬢惜年華。鳳城殘照歸鞍晚。禁籞無風柳自斜。

懷嵩樓新開南軒與郡僚小飲

繞郭雲烟匝幾重。昔人曾此感懷嵩。霜林落後山爭出。野菊開時酒正濃。解帶西風飄畫角。倚欄斜日照青松。會須乘醉攜嘉客。踏雪來看羣玉峯。

內直對月寄子華舍人持國廷評

禁暑沉沉玉漏傳。月華雲表溢金盤。纖埃不隔光初滿。萬物無聲夜向闌。蓮燭燒殘愁夢斷。薰爐薰歇覺衣單。水精宮鎖黃金闕。故比人間分外寒。

唐崇徽公主手痕和韓內翰

故鄉飛鳥尙啁啾。何況悲笳出塞愁。青塚埋魂知不返。翠崖遺迹爲誰留。玉顏自古爲身累。肉食何人與國謀。行路至今空歎息。巖花澗草自春秋。

蘇主簿挽歌洵

布衣馳譽入京都。丹旆俄驚反舊閭。諸老誰能先賈誼。君王猶未識相如。三年弟子行喪禮。千兩鄉人會葬車。我獨空齋挂塵榻。遺編時閱子雲書。

戲答元珍

春風疑不到天涯。二月山城未見花。殘雪壓枝猶有橘。凍雷驚筍欲抽芽。夜聞歸鴈生鄉思。病入新年感物華。曾是洛陽花下客。野芳雖晚不須嗟。

滄浪懷貫之

蘇舜欽

滄浪獨步亦無驚。聊上危臺四望中。秋色入林紅黯淡。日光穿竹翠玲瓏。酒徒漂落風前燕。詩社凋零霜後桐。君又暫來還徑去。醉吟誰復伴衰翁。

送樂職方知泗州

梅堯臣

長堤凍柳不堪折。窮臘使君單騎行。蘇合輕裘霜莫犯。銅牙大弩吏先迎。山旁楚賈連檣泊。水上禹書寒。

磬清。試向郡樓東北望。烟波千里月臨城。

送少卿張學士知洪州

朱旗畫舸一百尺。五月長江水拍天。穩去先應望廬岳。暫來誰復見龍泉。閣經吏部重爲記。山識吳王舊鑄錢。往迹可尋軍事少。牘書遺逸附青編。

和韓欽聖學士襄陽聞喜亭

亭欄下望漢江水。淨綠無風寫鏡明。日腳穿雲射洲影。槎頭擺子出潭聲。檣帆落處遠鄉思。砧杵動時歸客情。使者徘徊有佳興。高吟不減謝宣城。

上元進詩

蔡襄

疊聳青峯寶炬森。端門方佇翠華臨。宸遊不爲三元夜。樂事全歸萬衆心。天上清光開夜色。人間和氣闔春陰。要知盡作華封祝。四十年來惠化深。

錢塘上元夜祥符寺陪咨臣郎中丈燕席

曾鞏

月明如畫露華濃。錦帳名郎笑語同。金地夜寒消美酒。玉人春困倚東風。紅雲燈火浮滄海。碧水樓臺浸遠空。白髮蹉跎歡意少。強顏猶入少年叢。

甘露寺多景樓

欲收佳景此樓中。徙倚闌干四望通。雲亂水光浮紫翠。天含山氣入青紅。一川鐘唄淮南月。萬里帆檣海外風。老去衣衿塵土在。祇將心目羨冥鴻。

上元

金鞍馳騁屬兒曹。夜半喧闐意氣豪。明月滿街流水遠。華燈入望衆星高。風吹玉漏穿花急。人近朱闌送目勞。自笑低心逐年少。祇尋前事撚霜毛。

寒食許昌道中寄幕府諸君

司馬光

原上烟蕪淡復濃。寂寥佳節思無窮。竹林近水半邊綠。桃樹連村一片紅。盡日解鞍山店雨。晚天回首酒旗風。遙知幕府清明飲。應笑驅馳羈旅中。

伏蒙留守相公賜示陪太師潞公東田宴集詩輒敢屬和

舞雩新雨浹公田。水滿東溪上下天。行徑乍迂初見筍。浮舟正好未生蓮。絃收裂帛胡琴闕。袖結清風楚舞妍。相國火光滿路。夜歸不假玉蟾圓。

依韻恭和御製上元觀燈

王珪

雪消華月滿天臺。萬燭當樓寶扇開。雙鳳雲中扶輦下。六鼇海上駕峯來。鎬宮春酒霑周宴。汾水秋風陋漢才。一曲昇平人盡樂。君王又進紫霞杯。

次韻和元厚之平羌

詔收新土鳳林東。四百餘年陷犬戎。葱嶺自橫秦塞上。金城還落漢圖中。輕裘坐款無遺策。解髮來庭有舊風。零雨未濛音已捷。不勞歸旅咏周公。

聞种諤脂米川大捷

神兵十萬忽乘秋。西磧妖氛一夕收。疋馬不嘶榆塞外。長城自起玉關頭。君王別繪凌烟閣。將帥今輕定遠侯。莫道無人能報國。紅旗行去取涼州。

金陵懷古

王安石

霸祖孤身取二江。子孫多以百城降。豪華盡出成功後。逸樂安知與禍雙。東府舊基留佛剎。後庭餘唱落船牕。黍離麥秀從來事。且置興亡近酒缸。天兵南下此橋江。敵國當時指顧降。山水雄豪空復在。君王神武自難雙。留連落日頻回首。想像餘墟獨倚牕。卻怪夏陽纔一葦。漢家何事費罍缸。地勢東回萬里江。雲間天闕古來雙。兵纏四海英雄得。聖出中原次第降。山水寂寥埋王氣。風烟蕭颯滿僧牕。廢陵壞塚空冠劍。誰復沾纓酌一缸。憶昨天兵下蜀江。將軍談笑士爭降。黃旗已盡年三百。紫氣空收劍一雙。破堞自生新草木。廢宮誰識舊軒窗。不須搔首尋遺事。且倒花前白玉缸。

登寶公塔

倦童疲馬放松門。自把長筇倚石根。江月轉空爲白晝。嶺雲分暝與黃昏。鼠搖岑寂聲隨起。鷓鴣荒寒影對翻。當此不知誰客主。道人忘我我忘言。

次韻平甫金山會宿寄親友

天末海門橫北固。烟中沙岸似西興。已無船舫猶聞笛。遠有樓臺祇見燈。山月入松金破碎。江風吹水雪

崩騰飄然欲作乘桴計。一到扶桑恨未能。

段氏園亭

欵眠隨水轉東垣。一點炊烟映水昏。漫漫芙蕖難覓路。脩脩楊柳獨知門。青山呈露新如染。白鳥嬉遊靜不煩。朱雀航邊今有此。可能搖蕩武陵源。

次御河寄城北會上諸友

客路花時祇攪心。行逢御水半晴陰。背城野色雲邊盡。隔屋春聲樹外深。香草已堪回步履。午風聊復散衣襟。憶君載酒相追處。紅萼青跗定滿林。

寄袁州曹伯玉使君

宜春城郭繞樓臺。想見登臨把一盃。濕濕嶺雲生竹菌。冥冥江雨熟楊梅。政成定入邦人詠。詩就還隨驛使來。錯莫風沙愁病眼。不知何日爲君開。

池上春日

王安國

一池春水綠於苔。水上花枝間竹開。芳草得時依舊長。文禽無事等閒來。年顏近老空多感。風雅含情苦不才。獨有浴沂遺想在。使人終日此徘徊。

登湖光亭

韓維

雪盡塵消徑露沙。公家池館似山家。翠痕滿地初生草。紅氣通林未放花。匝岸平波清照鴈。壓城危榭斗回鴉。自慚白首猶圭組。此地年年賞物華。

烟雨樓

鄭俠

仙人居處卽驚宮。更作層樓峭倚空。羣岫西來烟漠漠。大江南去雨濛濛。花鑣柳策熙怡裏。耘笠漁簑笑語中。別有夜楹千里月。凭欄清興與誰同。

過冀州聞介甫送遼使當相遇繼得移文以故事請避諸路又以詩見寄次韻和答

沈遵

風沙敝盡舊狐裘。走馬歸來過冀州。聞報故人當邂逅。便臨近館爲遲留。不容傾蓋論時事。空寄新詩寫客愁。卻望後車塵已合。簫聲清斷去如流。

思京口戲周器之

王令

江南別日醉方醺。貪愛青天帶水痕。忘卻碧山歸路直。誤投浮世俗塵昏。終期散髮江邊釣。當有漁舟日繫門。但恨故人猶喜仕。他時胸腹未堪論。

郊行卽事

程伯子

芳原綠野恣行時。春入遙山碧四圍。興逐亂紅穿柳巷。困臨流水坐苔磯。莫辭盞酒十分醉。只恐風花一片飛。況是清明好天氣。不妨游衍莫忘歸。

傅堯俞濟源草堂

蘇軾

微官共有田園興。老罷方尋隱退廬。栽種成陰十年事。倉皇求買萬金無。先生卜築臨清濟。喬木如今似畫圖。鄰里亦知偏愛竹。春來相與護龍雛。

新城道中

東風知我欲山行。吹斷簷間積雨聲。嶺上晴雲披絮帽。樹頭初日挂銅鉦。野桃含笑竹籬短。溪柳自搖沙水清。西崦人家應最樂。煮芹燒筍餉春耕。

正月二十日往岐亭郡人潘古郭三人送余於女王城東禪莊院

十日春寒不出門。不知江柳已搖村。稍聞決決流冰谷。盡放青青沒燒痕。數畝荒園留我住。半甌濁酒待君溫。去年今日關山路。細雨梅花正斷魂。

與秦太虛參寥會於松江而關彥長徐安中適至分韻得風字

吳越溪山興未窮。又扶衰病過垂虹。浮天自古東南水。送客今朝西北風。絕境自忘千里遠。勝遊難復五人同。舟師不會留連意。擬看斜陽萬頃紅。

二子緣詩老更窮。人間無處吐長虹。平生睡足連江雨。盡日舟橫擘岸風。人笑年來三黜慣。天教我輩一樽同。知君欲寫長相憶。更送銀盤尾鬣紅。

岐亭道上見梅花戲贈季常

蕙死蘭枯菊亦摧。返魂香入嶺頭梅。數枝殘綠風吹盡。一點芳心雀啞開。野店初嘗竹葉酒。江雲欲落豆稭灰。行當更向欽頭見。病起烏雲正作堆。

二月三日點燈會客

江上東風浪接天。苦寒無賴破春妍。試開雲夢羔兒酒。快瀉錢塘藥玉船。蠶市光陰非故國。馬行燈火記

當年冷烟濕雪梅花在。留得新春作上元。

舟行至清遠縣見顧秀才極談惠州風物之美

到處聚觀香案吏。此邦宜着玉堂仙。江雲漠漠桂花溼。海雨翛翛荔子然。聞道黃柑常抵鵲。不容朱橘更論錢。恰從神武來弘景。便向羅浮見稚川。

正月二十六日偶與數客野步嘉祐僧舍東南野人家雜花盛開扣門求觀主人林氏媪出應白髮青裙少寡獨居三十年矣感歎之餘作詩記之

縹帶細枝出絳房。綠陰青子送春忙。涓涓泣露紫含笑。燄燄燒空紅佛桑。落日孤烟知客恨。短籬破屋爲誰香。主人白髮青裙袂。子美詩中黃四娘。

出潁口初見淮山是日至壽州

我行日夜向江海。楓葉蘆花秋興長。平淮忽迷天遠近。青山久與船低昂。壽州已見白石塔。短棹未轉黃茆岡。波平風軟望不到。故人久立烟蒼茫。

壽星院寒碧軒

清風蕭蕭搖牕扉。牕前修竹一尺圍。紛紛蒼雪落夏簟。冉冉綠霧沾人衣。日高山蟬抱葉響。人靜翠羽穿林飛。道人絕粒對寒碧。爲問鶴骨何緣肥。

正月二十日與潘郭二生出郊尋春忽記去年是日同至女王城作詩乃和前韻

東風未肯入東門。走馬還尋去歲村。人似秋鴻來有信。事如春夢了無痕。江城白酒三杯釀。野老蒼顏一

笑溫已約年年爲此會。故人不用賦招魂。

孤山二詠并引

孤山有陳時柏二株。其一爲人所薪。山下老人自爲兒已見其枯矣。然堅悍如金石。愈於未枯者。僧志侔作堂於其側。名之曰柏堂。堂與白公居易竹閣相連。屬余作二詩以紀之。

柏堂

道人手種幾生前。鶴骨龍姿尙宛然。雙幹一先神物化。九朝三見太平年。忽驚華構依巖出。乞與佳名到處傳。此柏未枯君記取。灰心聊伴小乘禪。

竹閣

海山兜率兩茫然。古寺無人竹滿軒。白鶴不留歸後語。蒼龍猶是種時孫。兩叢卻似蕭郎筆。千畝空懷渭上村。欲把新詩問遺像。病維摩詰更無言。

與述古自有美堂乘月夜歸

娟娟雲月稍侵軒。澗澗星河半隱山。魚鱗未收清夜永。鳳簫猶在翠微間。淒風瑟縮經絃柱。香霧淒迷着髻鬢。共喜使君能鼓樂。萬人爭看火城還。

雪夜書北臺壁

黃昏猶作雨纖纖。夜靜無風勢轉嚴。但覺衾裯如潑水。不知庭院已堆鹽。五更曉色來書幌。半夜寒聲落畫簷。試掃北臺看馬耳。未隨埋沒有雙尖。

城頭初日始翻鴉。陌上晴泥已沒車。凍合玉樓寒起粟。光搖銀海眩生花。遺蝗入地應千尺。宿麥連雲有幾家。老病自嗟詩力退。空吟冰柱憶劉叉。

六年正月二十日復出東門仍用前韻

亂山環合水侵門。身在淮南盡處村。五畝漸成終老計。九重新掃舊巢痕。豈惟見慣沙鷗熟。已覺來多釣石溫。長與東風約今日。暗香先返玉梅魂。

次韻王晉卿奉詔押高麗燕射

北苑傳呼陞楯郎。東蕃初識令君香。天山自可三箭取。海國何勞一葦航。宣勸不辭金盃側。醉歸爭看玉鞭長。錦囊詩草勤收拾。莫遣雞林得夜光。

紅梅

怕愁貪睡獨開遲。自恐冰容不入時。故作小紅桃杏色。尙餘孤瘦雪霜姿。寒心未肯隨春態。酒暈無端上玉肌。詩老不知梅格在。更看綠葉與青枝。石曼卿紅梅詩云。認桃無綠葉。辨杏有青枝。

送龔鼎臣諫議移守青州

蘇轍

稷下諸公今幾人。三爲諫議髮如銀。梁王宮殿歸留鑰。尙父山河屬老臣。沂水絃歌重曾點。菑川故舊識平津。過家定有金錢費。梓里爭看衣錦身。西山負海古諸侯。信美東南第一州。勝概未容秦地險。奇花僅比雒城優。新絲出盎冬裘易。貢棗登場歲事休。鈴閣虛閑官釀熟。應容將佐得遨遊。

次韻張恕春暮

祇言城市無佳處，亦有江湖幾度遊。
好雨晴時三月暮，啼鶯到後百花休。
老猿好飲常聯臂，野馬依人自絡頭。
不肯低回池上醉，試看生滅水中漚。

清涼寺

孔武仲

白寺荒灣略艤舟，攜筇來作上方遊。
何年巧匠開山骨，自古精兵聚石頭。
故壘無人空向久，高堂問話凜生秋。
雲菴快望窮千里，一借澄江洗客憂。

八月十六日翫月

孔平仲

團團冰鏡吐清輝，今夜何如昨夜時。
只恐月光無好惡，自憐人意有盈虧。
風摩露洗非常潔，地闊天高是處宜。
百尺曹亭吾獨有，更教玉邃倚欄吹。

西行

繚繞西行入亂山，白雲深處據征鞍。
蕎花着雨相爭秀，棗頰迎陽一半丹。
鞅掌未能逃物役，乾坤何處託身安。
莒臺東嚮情無限，那更秋風作暮寒。

造王館公第馬上作

濯濯春容在柳梢，野梅相壓吐香苞。
日邊明晦雲無定，雨後寒暄氣欲交。
抱蕊懸蟲猶帶繭，銜枝飛鳥已營巢。
高懷不愛三公府，白水青山滿近郊。

海陵西樓寓目

賀鑄

天涯尊酒與誰開。風外徂春挽不回。掃地可憐花更落。卷簾無奈燕還來。王孫莫顧漳濱臥。漁父何知楚客才。強策鴛鴦懷故國。浮雲千里思悠悠。

烏江東鄉往還馬上作

悠悠東去欲何之。草草西還可是歸。殘日兩竿荒戍遠。青山滿眼故園非。江田經雨菰蔣熟。石路無風蠨蠖飛。回羨耕夫閑勝我。蚤收雞犬閉柴扉。

九日登戲馬臺

當年節物此山川。倦客登臨獨惘然。戲馬臺荒年自久。斬蛇人去事空傳。黃華半老清霜後。白鳥孤飛落照前。不與興亡城下水。穩浮漁艇入淮天。

懷寄寇元弼

君投筦庫可知非。我飽官糧又願違。舊國秋高鴻鴈過。長淮水落白魚肥。西風吹夢端相覓。南物留人也念歸。何日蘆軒下雙榻。滿持尊酒洗塵機。

江上有懷李易初

何處經行特惘然。津頭曾送木蘭船。桃花春水生前夜。楊柳秋風憶故年。驛路尺書疑斷絕。官倉斗米愧留連。飄飄復作江湖計。從此長安是日邊。

甘露上方

滄江萬景對朱欄。白鳥羣飛去復還。雲捧樓臺出天上。風飄鐘磬落人間。銀河倒瀉分雙月。錦水西來轉

楊蟠

幾山。今古冥冥難借問。且持玉爵破愁顏。

卷六

七言律

題落星寺

黃庭堅

落星開士深結屋。龍閣老翁來賦詩。寺僧擇隆作宴坐。小軒爲落星之勝處。小雨藏山客坐久。長江接天帆到遲。宴寢清香與世隔。畫圖絕妙無人知。僧隆畫甚富。而寒山拾得畫最妙。蜂房各自開戶牖。處處煮茶藤一枝。

次韻裴仲謀同年

交蓋春風汝水邊。客牀相對臥僧氈。舞陽去葉纔百里。賤子與公俱少年。白髮齊生如有種。青山好去坐無錢。烟沙篁竹江南岸。輸與鷓鴣取次眠。

登快閣

癡兒了卻公家事。快閣東西倚晚晴。落木千山天遠大。澄江一道月分明。朱絃已爲佳人絕。青眼聊因美酒橫。萬里歸船弄長笛。此心吾與白鷗盟。

夏日夢伯兄寄江南

故園相見略雍容。睡起南牕日射紅。詩酒一年談笑隔。江山千里夢魂通。河天月暈魚分子。櫛葉風微鹿

養茸幾度白沙青影裏。審聽嘶馬自搯筇。

次韻裴仲謨和何先輩

秦觀

汝南古郡寡參尋。兀兀長如鶴在陰。支枕星河橫醉後。入簾風絮報春深。青山未落詩人手。白髮誰知國士心。多謝名郎傳綠綺。愧無佳句比南金。

遊龍瑞宮次程公韻

靈祠真館闕山隈。形勢相高對越臺。莓徑翠依屏上轉。藕花紅繞鑑中開。鶴啣寶箭排烟去。龍護金書帶雨來。夾道萬星攢騎火。滿城爭看使君回。

次韻子瞻贈金山寶覺大師

雲峯一變隔炎涼。猶喜重來飯積香。宿鳥水干迎曉鬧。亂帆天際受風忙。青鞋踏雨尋幽徑。朱火籠紗語上方。珍重故人敦妙契。自憐身世兩微茫。

魚溝懷家

晁補之

生涯身事任東西。藥笥書囊偶自贖。柳嫩柔柔鴉欲乳。雪消冰動麥初齊。沙頭晚日橋竿直。淮上春風鴈鶩低。歸去未應芳物老。桃花如錦遍松溪。

登海州城樓

張耒

城外滄溟日夜流。城南山直對城樓。溪田雨足禾先熟。海樹風高葉易秋。疎傳里閭詢故老。秦皇車甲想東遊。客心不待傷千里。檻外風烟盡是愁。

夏日

長夏村墟風日清。簷牙燕雀已生成。蝶衣曬粉花枝午。蛛網添絲屋角晴。落落疎簾邀月影。嘈嘈虛枕納溪聲。久拚兩鬢如霜雪。直欲樵漁過此生。
黃簾翠幕斷飛蠅。午影當軒睡未興。枕穩海魚鑄紫石。扇涼山雪畫青絳。廊陰日轉彫欄樹。坐冷風生玉盃冰。滿案詩書塵蠹甚。故應疎懶過炎蒸。
棗徑瓜畦經雨涼。白衫烏帽野人裝。幽花避日房房斂。翠樹含風葉葉涼。養拙久判藏姓字。置身安事巧文章。漢庭卿相皆豪傑。不遇何妨白髮郎。

和周廉彥

天光不動晚雲垂。芳草初長襯馬蹄。新月已生飛鳥外。落霞更在夕陽西。花開有客時攜酒。門冷無車出畏泥。修禊洛濱期一醉。天津春浪綠浮堤。

九日寄秦觀

陳師道

疾風回雨水明霞。沙步叢祠欲暮鴉。九日清樽欺白髮。十年爲客負黃花。登高懷遠心如在。向老逢辰意有加。淮海少年天下士。可能無地落烏紗。

次韻李節推九日登南山

平林廣野騎臺荒。山寺鳴鐘報夕陽。人事自生今日意。寒花只作去年香。巾欹更覺霜侵鬢。語妙何妨石作腸。落木無邊江不盡。此身此日更須忙。

春懷示隣里

斷牆着雨蝸成字。老屋無僧燕作家。剩欲出門追語笑。卻嫌歸鬢着塵沙。風翻蛛網開三面。雷動蜂窠趁兩衙。屢失南隣春事約。只今容有未開花。

和寇十一晚登白門

重門傑觀屹相望。表裏山河自一方。小市張燈歸意動。輕衫當戶晚風長。孤臣白首逢新政。遊子青春見故鄉。富貴本非吾輩事。江湖安得更相忘。

城上

彭汝礪

孤城縱目盡南東。山轉溪回翠萬重。雲際靜浮濱漢水。林端清送上方鐘。今時漢北無雛鳳。當日襄南有臥龍。萬事廢興無足問。登臨吾樂正從容。

寄隱居士

謝逸

處士骨相不封侯。卜居但得林塘幽。家藏玉牒幾千卷。手校韋編三十秋。相知四海孰青眼。高臥一麾今白頭。襄陽耆舊郎獨苦。只有龐公不入州。

偕陳調翁龍山買舟待夜潮發

蘇過

來逢春雨長魚苗。去見秋風擊蟹螯。久矣歸心到鄉國。依然水宿伴魚舠。一天如許皆明月。二客所須惟濁醪。今夜四更潮有信。更須留眼看銀濤。

夜泊寧陵

韓駒

汴水日馳三百里。扁舟東下更開帆。且辭杞國風微北。夜泊寧陵月政南。老樹挾霜鳴窅窅。寒花垂露落
穆穆。茫然不悟身何處。水色天光共蔚藍。

和李上舍冬日書事

北風吹日晝多陰。日暮擁階黃葉深。倦鵲遶枝翻凍影。飛鴻摩月墮孤音。推愁不去如相覓。與老無期稍
見侵。顧藉微官少年事。病來那復一分心。

奉送晁伯南歸金谿

張元幹

君家諸父多人傑。半是平生親舊間。莫話故園空矯首。相逢逆旅足開顏。文元勳業金甌字。昭德風流玉
筍班。此去騰驤吐虹氣。何由來伴老夫閑。

書寧川驛壁

汪藻

過眼空花一餉休。坐狂猶得佐名州。雖遭瀧吏嗤韓子。卻喜溪神識柳侯。盡日野田行穉耜。有時雲嶠聽
鉤輈。會將新濯滄浪足。踏遍千巖萬壑秋。

渡橫溪

李彌遜

百尺滄浪兩岸沙。肩輿徒步欹斜。溪聲猶帶夜來雨。山色漸分雲外霞。岸曲斷林開鳥道。水邊疎竹近
人家。塵埃何處尋真境。試逐寒流認落花。

凌歊晚眺

周紫芝

故鄉南望幾時回。落日登臨眼自開。倚杖獨看飛鳥去。開牕忽擁大江來。傷心不見姑溪老。抱病還尋宋

武臺歲晚無人弔遺跡。壁間詩在半灰埃。

次韻寄日新

周孚

南去關河雪正深。尚煩歸鴈與傳音。泫泫逝水經新歲。落落寒松只舊心。別後漢陂誰與賦。老來梁父不須吟。毀車殺馬吾何敢。抱甕相從老漢陰。

送辛幼安

西風掠面不勝塵。老欲從君自濯薰。兩意未成還忤俗。一飢相迫又離羣。只今參佐須孫楚。何日公卿屬范雲。節物關心那可別。斷紅疎綠正春分。

城西卽事

王琮

清曉離家去路遙。絕憐寒景太蕭條。松深漸覺風聲緊。雲動還知雪意銷。沙背客擔魚種賣。山頭人拾樹枝燒。梅花多處誰家酒。斜舞青帘隔小橋。

春日山行

王庭珪

緩鞚青絲馬不嘶。春山草長靜柴扉。迸林新筍斑斑出。隔水幽禽款款飛。雨過泉聲鳴嶺背。日長花氣撲人衣。雲藏遠岫茶烟起。知有僧居在翠微。

題郭秀才釣亭

野闊江寒一鴈飛。碧蘆花老鱖魚肥。遶欄綠水秋初淨。滿棹白蘋人未歸。醉任狂風揭茅屋。臥聽殘雪打蓑衣。他年欲訪沙頭路。會自攜竿扣竹扉。

送胡邦衡之新州貶所

囊封初上九重關。是日清都虎豹閑。百辟動容觀奏牘。幾人回首愧朝班。名高北斗星辰上。身墮南州瘴海間。不待他年公議出。漢廷行召賈生還。

雨後至城外

呂本中

日日思歸未就歸。只今行露已霑衣。江村過雨蓬麻亂。野水連天鶴鶴飛。塵務卻嫌經意少。故人新更得書稀。鹿門縱隱猶多事。苦向人前說是非。

次韻周教授秋懷

陳與義

一官不辦作生涯。幾見秋風捲岸沙。宋玉有文悲落水。陶潛無酒對黃花。天機袞袞山新瘦。世事悠悠日自斜。誤矣載書三十乘。東門何地不宜瓜。

寓居劉倉廨中晚步過鄭倉臺上

紗巾竹杖過荒陂。滿面春風二月時。世事紛紛人易老。春陰漠漠絮飛遲。士衡去國三間屋。子美登臺七字詩。草遠天西青不盡。故園歸計又支頤。

登岳陽樓

洞庭之東江水西。簾旌不動夕陽遲。登臨吳蜀橫分地。徙倚湖山欲暮時。萬里來遊還望遠。三年多難更凭危。白頭弔古霜風裏。老木蒼波無限悲。

巴邱書事

三分書裏識巴邱。臨老避兵初一遊。晚木聲酣洞庭野。晴天影抱岳陽樓。四年風露侵遊子。十月江湖吐亂洲。未必上流須魯肅。腐儒空白九分頭。

題東家壁

斜陽步履過東家。便置清尊不煮茶。高柳光陰初罷絮。嫩鳧毛羽欲成花。羣公天上分時棟。閑客江邊管物華。醉裏吟詩空跌宕。借君素壁落栖鴉。

懷天經智老因訪之

今年二月凍初融。睡起茗溪綠向東。客子光陰詩卷裏。杏花消息雨聲中。西菴禪伯還多病。北柵儒先只固窮。忽憶輕舟尋二子。綸巾鶴氅試春風。

舟行遣興

會稽尙隔三千里。臨賀初盤一百灘。殊俗問津言語異。長年爲客路歧難。背人山嶺重重去。照鷁梅花樹樹殘。酌酒施樓今日意。題詩船壁後來看。

雨晴

天缺西南江面清。纖雲不動小灘橫。牆頭語鵲衣猶溼。樓外殘雷氣未平。盡取微涼供穩睡。急搜奇句報新晴。今宵勝絕無人共。臥看星河盡意明。

對酒

陳留春色撩詩思。一日搜腸一百迴。燕子初歸風不定。桃花欲動雨頻來。人間多待須微祿。夢裏相逢記

此杯白竹扉。前容醉舞。烟村渺渺。欠高臺。

春夜感懷寄席大光

管寧白帽且踟躕。孤鶴歸期難計年。倚杖東南觀百變。傷心雲霧隔三川。江湖氣動春還冷。鴻鴈聲迴人不眠。苦憶西州老太守。何時相伴一燈前。

謝人分餉洞庭柑

曾幾

黃柑分似得嘗新。坐我松江震澤濱。想見霜林三百顆。夢成羅帕一雙珍。流雲噴霧真成酒。帶葉連枝絕可人。莫向君家樊素口。瓠犀微隴遠山颯。

西湖泛舟

朱松

望湖樓下照衰顏。羞見塵埃兩鬢斑。風艇縱看山轉側。烟堤儘逐水回還。喚人歸去城鐘急。觸處相親嶺月彎。不用新詩摹絕境。定知長到夢魂間。

贈范直夫

將軍競病詩成處。南浦春歸蘭玉叢。漸減心情身老大。久乖談笑路西東。鄉關落日蒼茫外。樽酒寒花寂歷中。且與寓公同放曠。浩歌相屬倚秋風。

別張自彊

王銍

燕子低飛入壞簷。柳條輕拂綠繆繆。故園更在北山北。佳節可憐三月三。萬古愁多憑濁酒。九京事往落清談。都門別恨終難寫。滿眼風光思不堪。

入春半月未有梅花

尤袤

枯樹扶疎水滿池。攀翻未見玉團枝。應羞無雪教誰伴。未肯先春獨探支。幾度杖藜貪看早。一年芳信恨開遲。留連東閣空愁絕。只誤何郎作好詩。

德翁有詩再用前韻

文章仙伯記仇池。每想橫斜竹外枝。未放柔柯攢玉雪。稍看紅蒂染燕支。別來望遠憑誰寄。老去尋春只恐遲。把酒問花花解語。定應催促要新詩。

立馬黃昏遠曲池。幾回踏雪問南枝。不應春到花猶未。定恐寒侵力不支。隴上已驚傳信晚。樽前只想弄粧遲。臨風不語空歸去。獨立無聊自詠詩。

常記尋芳到習池。攀條頻認去年枝。曉穿曲徑千林去。晚度危橋一木支。不避春寒來得得。只緣人望故遲遲。無錢可辦羅浮醉。報答春光只有詩。

暮春上塘道中

范成大

店舍無烟野水寒。競船人醉鼓闌珊。石門柳綠清明市。洞口桃紅上巳山。飛絮著人春共老。片雲將夢晚俱還。明朝遮日長安道。慚愧江湖釣手閒。

四月五日集陳園照山堂

尋壑經邱到此堂。官閑聊作送春忙。短籬水面殘紅滿。團扇風前衆綠香。盡捲簾旌延竹色。深斟杯酒納山光。洞門無鎖城門近。轉午雞啼日正長。

鄂州南樓

誰將玉笛弄中秋。黃鶴飛來識舊遊。漢樹有情橫北渚。蜀江無語抱南樓。燭天燈火三更市。搖月旌旗萬里舟。卻笑鱸鄉垂釣手。武昌魚好便淹留。

初歸石湖

燒霧朝暎紺碧烘。橫塘西岸越城東。行人半出稻花上。宿鷺孤明菱葉中。信腳自能知舊路。驚心時復認鄰翁。當時手種斜橋柳。無限鳴蜩翠掃空。

再題瓶中梅花

園林疎落凍芳塵。南北枝間玉蘂皴。風袂挽香雖澹薄。月牕橫影已精神。雪霜春事年年晚。今古詩情日日新。鐵石如翁猶索句。真成嚼蠟對橫陳。

新夏感事

陸游

百花過盡綠陰成。漠漠爐香睡晚晴。病起兼旬疎把酒。山深四月始聞鶯。近傳下詔通言路。已卜餘年見太平。聖主不忘初政美。小儒惟有涕縱橫。

遊山西村

莫笑農家臘酒渾。豐年留客足雞豚。山重水複疑無路。柳暗花明又一村。簫鼓追隨春社近。衣冠簡朴古風存。從今若許閒乘月。拄杖無時夜扣門。

上虞逆旅見舊題歲月感懷

舴艋爲家東復西。今朝破曉下前溪。青山缺處日初上。孤店開時鶯亂啼。倦枕不成千里夢。壞牆間覓十年題。漆園傲吏猶非達。物我區區豈足齊。

柳林酒家樓

桃花如燒酒如油。緩轡郊原當出遊。微倦放教成午夢。宿醒留得伴春愁。遠途始悟乾坤大。晚節偏驚歲月遄。記取晴明果州路。半天高柳小青樓。

東湖新竹

插棘編籬謹護持。養成寒碧映淪漪。清風掠地秋先到。赤日行天午不知。解籜時聞聲簌簌。放梢初見葉離離。官閒我欲頻來此。枕簟仍教到處隨。

宴西樓

西樓遺跡尙英雄。錦繡笙簫在半空。萬里因循成久客。一年容易又秋風。燭光低映珠簾麗。酒暈徐添玉頰紅。歸路迎涼更堪愛。摩訶池上月方中。

題丈人觀道院壁

斷香浮月磬聲殘。木影如龍布石壇。偶駕青鸞塵世窄。閒吹玉笛洞天寒。奇香滿院晨炊藥。異氣穿巖夜浴丹。卻笑飛仙未忘俗。金貂猶著侍中冠。孫太古畫范長生作舉手整貂蟬像神氣尤奇逸

成都書事

大城少城柳已青。東臺西臺雪正晴。鶯花又作新年夢。絲竹常聞靜夜聲。廢苑烟蕪迎馬動。清江春漲拍

堤平尊中酒滿身強健。未恨飄零過此生。

數日暄妍頗有春意。予閑居無日不出遊戲作。

小春花蕾索春饒。已有暄風入紫貂。邨路雨晴鳩婦喜。射場草綠雉媒嬌。苑邊結客飛金勒。樓上誰家弄玉簫。莫怪夕陽歸獨後。早梅喚我度谿橋。蜀宣華苑在摩訶池上。

桐廬縣泛舟東歸

桐江艇子去乘月。笠澤老翁歸放慵。一尺輪囷霜蟹美。十分瀲灩社醅濃。宦遊何啻路九折。歸臥恨無山萬重。醉裏試吹蒼玉笛。爲君終夜舞魚龍。

雨

映空初作繭絲微。掠地俄成箭鏃飛。紙帳光遲饒曉夢。銅鑪香潤覆春衣。池魚鱗鱗隨溝出。梁燕翩翩接翅歸。惟有落花吹不去。數枝紅溼自相依。

書憤

早歲那知世事艱。中原北望氣如山。樓船夜雪瓜洲渡。鐵馬秋風大散關。塞上長城空自許。鏡中衰鬢已先斑。出師一表真名世。千載誰堪伯仲間。

村居初夏

天遣爲農老故鄉。山園三畝鏡湖傍。嫩莎經雨如秧綠。小蝶穿花似繭黃。斗酒隻雞人笑樂。十風五雨歲豐穰。相逢但喜桑麻長。欲話窮通已兩忘。

余年四十六入峽忽復二十三年懷感賦長句

當年弔古巴東峽。雪灑扁舟見早梅。宋玉宅邊新酒美。巫山廟下暮猿哀。樵柯爛盡碁方劇。客飯炊成夢未回。已把癡頑敵憂患。不勞團扇念寒灰。劉夢得團扇歌曰：當時初入君懷袖，豈想寒爐有死灰。

和昌英叔久雨

楊萬里

積雨今晨也解休。殷勤日腳傍花流。半明衣桁收梅潤。全爲農家放麥秋。更着好風墮清句。不知何地頓閑愁。新晴佳處無人會。隔柳一聲黃栗留。

霰

雪花遣霰作前鋒。勢頗張皇欲暗空。篩瓦巧尋疎處漏。跳塔誤到暖邊融。寒聲帶雨山難白。冷氣侵人火失紅。方訝一冬暄較甚。今宵敢歎臥如弓。

懷古堂前小梅漸開

梅邊春意未全回。淡日微風暗裏催。近水數枝殊小在。一梢雙朶忽齊開。生愁落去輕輕折。不怕春寒得得來。腸斷故園千樹雪。大江西處亂雲堆。

春晴懷故園海棠

竹邊臺榭水邊亭。不要人隨只獨行。乍暖柳條無氣力。淡晴花影不分明。一番過雨來幽徑。無數新禽有喜聲。只欠翠紗紅映肉。兩年寒食負先生。

寄題曾子與競秀亭

老夫上下蓼花灘。每過君家輒繫船。尊酒燈前山入座。孤鴻月底水連天。暄涼書問二千里。場屋聲名三十年。競秀主人文似豹。不應霧隱萬峯邊。

辛亥元日送張德茂自建康移帥江陵

西湖一別忽三年。白首相從豈偶然。到得我來恰君去。正當臘後與春前。醉餘犯雪追征帽。送了凭欄望去船。待把衣冠挂神武。看渠勳業上凌烟。

冬至節後賀皇太子及平陽郡主

長樂鐘聲遶夢驚。建章星影照人行。千官燈語聽殘點。一夜霜寒在五更。金鑰玉笏開北闕。銀鞍絲控謁東明。青宮朱邸環天極。五色祥雲覆帝城。

送趙民則少監提舉

座主門生四十年。江湖契闊幾風烟。同朝再接駕行裏。握手相看鶴髮前。誤喜論詩追舊事。不知呼酒是離筵。老懷只作還山夢。輸與先生早着鞭。

赴文德殿聽麻仍拜表

蒼龍觀闕啓槐宸。白玉塔除振鷺羣。仗外諸峯獻松雪。霜前一鴈度宮雲。舍人就日宣麻制。丞相瞻天進表文。夙退自欣還自笑。素餐便當策殊勳。

奉陪彥集充父同遊瑞巖謹次莆田使君留題之韻

踏破千林黃葉堆。林間臺殿鬱崔嵬。谷泉噴薄秋逾響。山翠空濛晝不開。一壑祇今藏勝概。三生疇昔記

朱子

曾來解衣正作留連計。未許山靈便卻回。

伏讀二劉公瑞巖留題感事興懷至於隕涕追次元韻偶成二篇錄一

誰將健筆寫崖陰。想見當年抱膝吟。緩帶輕裘成昨夢。遺風餘烈到如今。西山爽氣看猶在。北闕精誠直自深。故壘近聞新破竹。起公無路祇傷心。右懷寶學公作。

春谷次韻秀野閑居十五詠之六

武夷高處是蓬萊。采得靈根手自栽。地僻芳菲鎮長在。谷寒蜂蝶未全來。紅裳似欲留人醉。錦障何妨爲客開。飲罷醒心何處所。遠山重疊翠成堆。

秀野劉丈寄示南昌諸詩和此二篇錄一

滕王閣下水初生。聞道登臨復快晴。帝子詎知陳迹在。長江肯趁曲池平。山楹雨罷珠簾卷。簷鐸風驚玉佩鳴。滿眼悲涼今古恨。人生辛苦竟何成。

題鄭德輝悠然堂

高人結屋亂雲邊。直面羣峯勢接連。車馬不來真避俗。簞瓢可樂便忘年。移筇綠幄成三徑。回首黃塵自一川。認得淵明千古意。南山經雨更蒼然。

九日登天湖以菊花須插滿頭歸分韻賦詩得歸字

去歲瀟湘重九時。滿城寒雨客思歸。故山此日還佳節。黃菊清罇更晚暉。短髮無多休落帽。長風不斷且吹衣。相看下視人寰小。祇合從今老翠微。

前村梅次韻秀野閑居十五詠之末篇

玉立寒烟寂寞濱。仙姿瀟灑淨無塵。千林搖落今如許。一樹橫斜獨可人。真與雪霜娛晚景。任從桃柳殿殘春。綠陰青子明年事。衆口驚嗟鼎味新。

叔通老友探梅得句垂示且有領客攜壺之約

迎霜破雪是寒梅。何事今年獨晚開。應爲花神無意管。故煩我輩着詩催。繁英未怕隨清角。疎影誰憐蘸綠杯。珍重南鄰諸酒伴。又尋江路探香來。

賀車駕幸祕書省

呂祖謙

麟臺高柳識琇輿。共記中興幸省初。黃道再傳天子蹕。青編重入史臣書。需雲下際君恩盛。晨露高張樂節舒。若寫鴻猷參大雅。定非周鼓頌畋漁。紫青丹極與天鄰。闔闢乾坤繫笑顰。獨爲斯文回一顧。坐令吾道重千鈞。先王舊物參差見。列聖明謨次第陳。墨客區區感榮遇。豈知深意在彝倫。

題湖邊莊

王十朋

十里青山蔭碧湖。湖邊風物盡難如。夕陽茅舍客沽酒。明月小橋人釣魚。舊卜草莊臨水竹。來尋野叟問耕鋤。他年待掛衣冠後。乘輿扁舟取次居。

扈駕

呂定

八月秋高戰馬肥。觀兵郊外振天威。一聲鳳吹迎鸞馭。五色龍文雜袞衣。劍戟橫空金氣肅。旌旗映日彩

雲飛令嚴星火諸軍奮直定單于塞上歸。

班師

紫塞回鑾雪正晴。王師百萬擁連營。馬嘶大地山河壯。旗捲長空日月明。龍虎臺高千嶂聳。鳳凰城近五雲生。聖顏有喜天心順。中外歡聞奏凱聲。

蚤春卽事

華岳

楊柳絲絲弄淡黃。怯寒燕子未歸梁。曉迷芳草驩鬢濕。夜宿閑花蝶翅香。得句自慚非子美。賞音猶恐誤中郎。願言相約花前醉。莫放春容過海棠。

卽事

陳造

江樣晨光入縣門。樓斜晚影到漁村。海聲不爲無風靜。山色居常帶霧昏。問俗卽今防愒日。來時撫事錯銷魂。浮生寄寓君恩重。未覺天涯異故園。

頃遊龍井得一聯王伯齊同兒輩遊因足成之

樓鑰

路入風篁上翠微。老龍蟠井四山圍。水真綠淨不可唾。魚若空行無所依。勝處雖多終莫及。舊游誰在事皆非。祇今匏繫何由到。徒羨聯鑣帶月歸。

九月十三日始就郊墅拜寶謨閣直學士提舉江州太平興國宮之命

岳珂

槐影西清舞翠鸞。竹宮高接五雲環。職陪溫洛圖書地。名在元封卜祝間。畫舫未承龍閣問。晨香猶廁羽衣班。祠官到處無公事。且聽松聲老此山。

鼓瑟

滿樓明月調雲和。五十弦中急雨過。彩鳳拂衣鳴翠竹。素鱗鼓鬣出寒波。淒涼楚客新愁斷。清切湘靈舊怨多。一曲更沈人已靜。江頭雲挂綠嵯峨。

劉仙倫

玉壺卽事

雨過條風著柳芽。淡黃淺綠嫩如花。陂湖漾漾初侵路。蜂燕紛紛各理家。帶郭園林仙苑近。送春船舫繡簾遮。芸牕倦倚何山翠。暖靄輕籠日腳斜。

杜範

夢尋梅

野逕深藏隱者家。岸沙分路帶溪斜。馬蹄殘雪六七里。山觜有梅三四花。黃葉擁籬埋藥草。青燈煨芋話桑麻。一生烟雨蓬茅底。不夢金貂侍玉華。

方岳

詠梅

纔有梅花便絕塵。霜鋪月冷倍精神。風流晉宋之間客。清逸羲皇以上人。年後臘前無盡意。水邊林下自然春。萬花錦繡東風鬧。難挽脩脩玉雪身。纔有梅花便不同。一年清致雪霜中。疎疎籬落娟娟月。寂寂軒窗淡淡風。生長元從瓊玉圃。安排合在水晶宮。何須更探春消息。自有幽香夢裏通。

張道洽

湖上卽事

波光山色兩盈盈。短策青鞵信意行。葑草烟開遙認鷺。柳條春蚤未藏鶯。誰家豔飲歌初歇。有客孤舟笛

陳起

再橫風景無窮吟莫盡。且將酩酊樂浮生。

送廣州劉叔治倅欽州兼守事

樂雷發

天涯亭畔擁提屏。丹荔蕉黃滿去程。阜蓋卻迎新別駕。碧幢應憶老先生。象蹄印雨歸蠻國。鯨鬣掀潮撼海城。曾是鄉賢分守處。試尋醉石共題名。余靖韶州人曾守欽。

多景樓

柴望

蚤被垂楊繫去舟。五更潮落大江頭。關河北望幾千里。淮海南來第一樓。昔日最多風景處。今人偏動黍離愁。烟沙瀕洞翻蘋末。欲倚西風問仲謀。

卷七

五言排律

茶園十二韻

王禹偁

勤王修歲貢。晚駕過郊原。蔽芾餘千本。青葱共一園。牙新撐老葉。土軟迸新根。舌小侔黃雀。毛獐摘綠猿。出蒸香更別。入焙火微溫。採近桐華節。生無穀雨痕。緘膝防遠道。進獻趁頭番。待破華胥夢。先經閩闔門。汲泉鳴玉甃。開宴壓瑤罇。茂育知天意。甄收荷主恩。沃心同直諫。苦口類嘉言。未復金鑾召。年年奉至尊。

奉和御製契丹出境將議迴鑾五言六韻詩

楊億

戎輅巡河右。天威讐鬼方。五營開細柳。三令凜飛霜。氛祲消千里。聲明耀八荒。靈旗風助順。黃道日呈祥。

偃草邊關靜。迴鑿海縣康。欣陪從臣末。歸蹕奉高驤。

到郡滿歲自遣

迢遞分符竹。因循度歲華。地將鯨海接。路與鳳城賒。觸石雲頻起。銜山日易斜。潮平聚漁市。木落見人家。吏隱偏知幸。民謠豈敢誇。無嫌勾漏僻。且得養丹砂。

次韻和盛博士寄贈虞部李郎中之什

門牆日已峻。德望闇然彰。弟草西垣詔。身爲南省郎。墳簾歡並奏。龍虎儼成行。宴客牛心炙。朝天雞舌香。曲池春漲水。碧瓦曉飛霜。此景知何事。留賓汎羽觴。

咸平六年二月十八日扈從宸遊因成紀事二十二韻

步輦下明光。鳴鞘山未央。屬車多載酒。夾道競焚香。雲管飄梅吹。蜺旌錯鳥章。從臣沙苑馬。衛士羽林槍。玉輅天行健。金壺晝漏長。光風汎蘭蕙。仙霧拂旂常。宿雨收林薄。晨曦豔屋梁。閭闔空里巷。旄鉞隘康莊。託乘奉珍使。先驅執戟郎。從橋初轉轂。憑軾見垂裳。暫駐時龍馭。前臨戲馬場。由來講武事。所以服遐荒。電影流礮石。鷗羣發大黃。是日御講武。觀放拋石及發連弩。千鈞寧覺重。七札豈曾妨。卒勇如彪虎。人觀若堵牆。腰鞬晉元帥。扈蹕漢諸王。聊用誇胡客。還聞讐鬼方。迴輿百里圍。錫宴九霞觴。射以騶虞節。歌爲白雪倡。仙山鯨海上。御苑斗城旁。周鑄歡麀鹿。虞韶集鳳凰。瑤池春水綠。猶誤濯滄浪。

受詔修書述懷感事三十韻

太極垂裳日。中原偃革初。樓船秋發詠。衡石夜程書。好問虛前席。徵賢走傳車。蓬萊侔漢制。煨燼訪秦餘。

紬繹資金匱。規模出玉除。紛綸開四部。祕邃接千廬。飫賜雙雞膳。親迴六尺輿。華芝下閭闔。白羽擁儲胥。望氣成龍虎。披文辯魯魚。清光無咫尺。玄覽亦躊躇。羣彥揮鉛筆。微生濫石渠。嵇康真懶慢。謝客本空疎。講學情田塉。談經腹笥虛。月評依許劭。文體慕相如。雅飲歡娛洽。清言鄙怯祛。彌旬容出沐。終日喜羣居。撫己慙鳴玉。歸田憶荷鋤。池籠養魚鳥。章服裹猿狙。園府愁尸祿。天閨媿褻裾。虛名同鄭璞。散質類莊樗。國士誰知我。隣家或侮予。放懷齊指馬。屏息度羲舒。寡婦宜憂緯。三公亦灌蔬。危心惟穀觶。直道忍籛條。往聖容巢許。先儒美甯蘧。晨趨嘆勞止。夕惕念歸與。秦痔疎杯酒。顏瓢賴半儲。如諧曲肱臥。猶可直鉤漁。矯矯龜銜印。翩翩隼畫旗。一麾終遂志。阮籍去馳驅。

別墅

錢惟演

別館斗城傍。斜軒映曲房。蒼頭冠綠幘。中婦織流黃。複道登平樂。期門集未央。意錢梁冀宅。挾瑟莫愁堂。走馬章臺柳。停車陌上桑。彀弓隨寶帳。投轄付銀牀。出戴繁星急。歸衝細雨忙。曾過阿君宿。醉舞起跳梁。

曹太尉西師

石延年

仁者雖無敵。王師尚有征。獨乘金廐馬。都領鐵林兵。肅氣關河暮。屯烟部落晴。旗光秋燒去。甲色夜江橫。士喜擊中鼓。虜疑聞後鉦。無私乃時雨。不殺是天聲。濯濯前誰拒。堂堂彼自傾。寒逾博望塞。春燕隗囂城。外使戎心伏。旁資帝道平。公還如畫像。爲贊學班生。

蜀地海棠繁媚有思加膩幹豐條苒弱可愛北方所未見諸公作詩流播西人余素好玩不能自默然所道皆在前人陳迹中如國風申章亦無愧云

宋 祁

蜀國天餘煦。珍葩地所宜。濃芳不隱葉。併豔欲然枝。襞綵分羣萼。均霞點萬蕤。回文錦成後。夾煎燎烘時。蜂蕊迎銜密。鶯梢向坐危。淺深雙絕態。啼笑兩妍姿。絳節排烟竦。丹缸落帶垂。童容鄣畏薄。便面到憂遲。媚日能徐照。暄風肯遽吹。蜀少疾風。故花愈盛。惜觀當晚。留恨付離披。麗極都無比。繁多僅自持。損香饒麝柏。照影欠瑤池。畫要精侔色。歌須巧騁辭。舉尊頻語客。細摘玩芳期。

九日侍宴太清樓

薦九標佳節。中天駐翠輿。晨光清複道。秋色徧儲胥。畦稻霜成後。宮橙露飽初。省收行步玉。拜賜儼華裾。皇帝臨視刈稻。宣許從臣同觀。又令觀橙。訖並賜橙稻新米。曼衍來長樂。鷗夷下屬車。帝詔儀瑞鷗。玉藻躍恩魚。霽霧供披拂。涼風助掃除。高陽穿葉外。仙菊泛花餘。寒入弓聲厲。歡留酒算徐。神池元不浪。溫樹未曾疎。帝眷憑秋稼。臣心仰夏渠。承平將樂事。併入史臣書。

和晏相公九日郡宴

令序凝秋籥。歡遊駐使軒。行觴酒籥密。踏節舞鞞翻。榴熟丹房解。萸香紫粒繁。風頭獵輕慘。日腳送斜暄。鏤管新篇逸。轉運學士卽席賦詩。吹花舊俗存。請爲丞相壽。長久慶調元。

獻百花洲圖上陳州晏相公

范仲淹

穰下勝游少。此洲聊入詩。百花爭窈窕。一水自漣漪。潔白憐翹鷺。優游羨戲龜。闌干紅屈曲。亭宇碧參差。倒影澄坡底。橫烟落照時。月明魚競躍。春靜柳閒垂。萬竹排霜仗。千荷卷翠旗。菊分潭上近。菊花潭在郡之西郊。因有菊潭門。復有菊潭鎮。近取菊植於洲中。洲有高臺。遂命之曰菊臺。梅比漢南遲。京洛而南至。

鄧始有梅焉。梅比襄陽。又晚一月。岸鵲依人喜。汀鷗不我疑。綵絲穿石節。囊鄧問舊俗。正月二十二日。士女游河。取小石通中者。用綵絲穿之。帶以爲祥。羅襪踏青期。素髮頻來醉。滄浪減去思。步隨芳草遠。歌逐畫船移。繪寫求真賞。緘藏獻已知。相君那肯愛。家有鳳凰池。

送謝希深學士北使

歐陽修

漢使入幽燕。風烟兩國間。山河持節遠。亭障出疆閑。征馬聞笳躍。雕弓向月彎。禦寒低便面。贈客解刀環。鼓角雲中壘。牛羊雪外山。穹廬鳴朔吹。凍酒發朱顏。塞草生侵磧。春榆綠滿關。應須鴈北向。方值使南還。

初至夷陵答蘇子美見寄

三峽倚蒼蕘。同遷地最遙。物華雖可愛。鄉思獨無聊。江水流青嶂。猿聲在碧霄。野篁抽夏筍。叢橘長春條。未臘梅先發。經霜葉不凋。江雲愁蔽日。山霧晦連朝。斫谷爭收漆。梯林鬪摘椒。巴寶船賈集。蠻市酒旗招。時節同荆俗。民風載楚謠。俚歌成調笑。揜鬼聚喧囂。夷陵之俗多淫奔。又好祠祭。每遇祠時。里民數百共餽其餘。里語謂之揜鬼。因此多成鬪訟。得罪宜投裔。包羞分折腰。光陰催宴歲。牢落慘驚飈。白髮新年出。朱顏異域銷。縣樓朝見虎。官舍夜聞鴞。寄信無秋鴈。思歸望斗杓。須知千里夢。長繞洛陽橋。

明堂慶成

辰火天文次。臯門路寢闕。奉親昭孝德。惟帝饗精誠。禮以三年講。時因萬物成。九筵嚴太室。六變導和聲。象魏中天起。風雷大號行。歡呼響山岳。流澤浹根莖。寶墨飛雲動。金文耀日晶。從臣才力薄。無以頌休明。

羣玉殿賜宴

至治臻無事。豐年樂有成。圖書開祕府。宴飲集羣英。論道皇墳奧。貽謀寶訓明。九重多暇豫。八體極研精。筆力千鈞勁。毫端萬象生。飛牋金灑落。拜賜玉鏘鳴。盛際崇儒學。愚臣濫寵榮。惟能同舞獸。聞樂識和聲。

下直呈同行三公

午漏聲初轉。歸鞍路偶同。天清黃道日。街闊綠槐風。萬國舟車會。中天象魏雄。戢戈清四海。論道屬三公。自愧陪臣彥。從來但樸忠。時平容竊祿。歲晚歎衰翁。買地淮山北。垂竿潁水東。稻粱雖可戀。吾志在冥鴻。

東閣雨中

直閣時偷暇。幽懷坐獨哦。綠苔人迹少。黃葉雨聲多。雲結愁陰重。風傳禁漏過。瑤圖新嗣聖。玉塞久包戈。相府文書簡。豐年氣候和。還將鳳池句。聊雜野人歌。

早赴府學釋奠

羽籥興東序。春秋紀上丁。行祠漢丞相。學禮魯諸生。俎豆兼三代。樽罍奠兩楹。霧中槐市暗。日出杏壇明。昔齒公卿胄。嘗聞絃誦聲。何須向闕里。首善本西京。

和劉原父從幸後苑觀稻呈經筵諸公

禁籞皇居接。香畦鏤檻邊。分渠自靈沼。種稻滿澎田。六穀名居首。三農政所先。擢莖蒙德茂。養實以時堅。曉謁龍墀罷。行瞻鳳蓋翩。粹容知喜色。嘉瑞奏豐年。衰病慚經學。陪遊與俊賢。安知帝力及。但樂歲功全。拜賜秋風裏。分行黼座前。自憐篋笠叟。來綴侍臣篇。

翠旌詩

盛禮郊儀肅。純音帝樂清。葳蕤飄翠羽。赫奕展華旌。鳳邸光交覆。鸞旗色共明。繽紛拂葩蓋。輝映雜綵纓。且異文竿飾。非同翾舞名。竹宮歌愆祀。雅曲播遺聲。

和王正仲熙寧郊祀二十韻

劉攽

駿命膺長發。鴻圖本慎徽。八方星拱極。四海日升暉。舊典增咸秩。彌文示表微。聖時均玉燭。天統正璿璣。南極迎陽復。陰泉候氣歸。積高常眷顧。昭孝每無違。羽衛來雙闕。和鑾並六飛。風霆齊命令。龍虎會旌旂。帳殿層城暮。金波列宿稀。嚴更虛夜鑿。彫輦下彤闈。廣樂千人唱。升烟萬目晞。衆神知受記。象物競來依。陟降兼明察。圓方比範圍。送音仍嚮鬻。畀福想霏霏。霈澤蘇羣動。春陽暢壝扉。慶深周揭厲。感極致歎欷。多士參鳴玉。微生廁阜衣。肅雍瞻帝武。奉引近天威。儒館鸞鷟舊。長謠錦繡輝。因知子雲賦。何足頌巍巍。

寄鄆州邵資政蒙問敝邑山水之景見索新詩重意之辱謹吟二百字上寄 曾鞏

鉛筆讐書客。宋轡守土臣。素餐方側席。黃髮已侵巾。喜有山園郭。仍憐水滿津。清華閑耳目。蕭灑長精神。秀色秋來重。寒聲雨後新。宿雲依戶牖。流月過松筠。北圃分殊境。西湖斷俗塵。渚花紅四出。沙鳥翠相親。芡老含珠實。魚驚躍錦鱗。飛梁凌窅眇。虛榭壓奩淪。嶺對橫修竹。洲分抱白蘋。靜宜人事拙。閑覺道腴真。器小難周物。官微幸庇身。簿書偷暇日。杖屨想幽人。泝險飛游艇。探奇樣釣緝。形塵甘鶴怨。心泰得鷗馴。督府恩容久。芳牋訊問頻。門庭嚴衛戟。尊俎從華紳。卻從烟霞興。還思水石鄰。自嗤田父樂。那可薦鴻鈞。

大饗明堂慶成

王珪

皇祐更秋律。明堂奉帝禋。棗盛雖薦德。霜露本懷親。於赫朝三后。無人秩百神。九筵交玉幣。重屋近星辰。

遼幄留颺御。清壇墮月津。衣冠漢儀舊。金石舜韶新。受祚開宣室。鳴鐘降紫宸。羣陰光復旦。叶氣斗迴春。靈貺叢千祀。豐恩滲四垠。慚非老辭筆。徒學煥堯文。

雙廟

王安石

兩公天下駿。無地與騰驤。就死得處所。至今猶耿光。中原擅兵革。昔日幾侯王。此獨身如在。誰令國不亡。北風吹樹急。西日照牕涼。志士千年淚。冷然落奠觴。

送鄆州知府宋諫議

盛世千齡合。宗功四海瞻。天心初籲俊。雲翼首離潛。德望完圭角。儀形壯陛廉。徐鳴蒼玉佩。盡校碧牙籤。綸掖清光注。鑾坡茂渥霑。文明誠得主。政瘼尙煩砭。右府參機務。東塗贊景炎。廟謨資石畫。兵略倚珠鈐。坐鎮均勞逸。齋居養智恬。謳謠喧井邑。惠化穆蒼黔。進律朝章舊。疏恩物議僉。通班三殿邃。徙部十城兼。申甫周之翰。龜蒙魯所詹。地靈奎宿照。野沃汶河漸。首路龍旗盛。提封虎節嚴。賜衣纏紫艾。衛甲綴朱綬。海谷移文省。谿堂燕豆添。班春回紺纓。問俗卷彤襜。舟楫商巖命。熊羆渭水占。治裝行入覲。金鼎重調鹽。

郊祀慶成

蘇軾

帝出乘昌運。天心予太平。文章三代繼。制作七年成。大祀乾坤合。剛辰日月明。泰壇朝掃地。魄寶夜垂精。仰御圓蒼蓋。環觀海岳城。北流吞朔易。西極落撿槍。升燎靈光答。迴鸞瑞霧迎。需雲徧枯槁。解雨達勾萌。可頌非天德。因箴亦下情。民言知可酌。帝謂本無聲。富國由崇儉。新年在好生。無心斯格物。克己自消兵。化國安新政。孤臣返舊耕。還將清廟什。留與野人賡。

趙德麟餞飲湖上舟中對月

老守惜春意。主人留客情。官餘閒日月。湖上好清明。新火發茶乳。溫風散粥餿。酒闌紅杏闌。日落大堤平。清夜除燈坐。孤舟擘岸撐。逮君幘未墮。對此月猶橫。

城南縣尉水亭得長字

兩尉鬱相望。東南百步場。插旗蒲柳市。伐鼓水雲鄉。已作觀魚檻。仍開射鴨堂。全家依畫舫。極目亂紅粧。激激波頭細。疎疎雨腳長。我來閑濯足。溪漲欲浮牀。澤國山圍裏。孤城水影傍。欲知歸路處。葦外記風檣。自礧溪往陽平憩於麻田青峯寺之下院翠麓亭

不到峯前寺。空來渭上村。此亭聊可喜。脩徑豈辭捫。谷映朱欄秀。山含古木尊。路窮驚石斷。林缺見河奔。馬困嘶青草。僧留薦晚飧。我來秋日午。早久石牀溫。安得雲如蓋。能令雨瀉盆。共看山下稻。涼葉晚翻翻。同王勝之遊蔣山

到郡席不煖。居民空惘然。好山無十里。遺恨恐他年。欲款南朝寺。同登北郭船。朱門收畫戟。紺宇出青蓮。夾路蒼髯古。迎人翠麓偏。龍腰蟠故國。鳥爪寄層巔。山有鳥爪峯。竹杪飛華屋。松根洙細泉。峯多巧障日。江遠欲浮天。略徇橫木橋。橫秋水。浮屠插莫烟。歸來踏人影。雲細月娟娟。

東觀讀未見書

黃庭堅

漢規羣玉府。東觀近宸居。詔許無雙士。來觀未見書。皇文開萬卷。家學陋三餘。竹帛森延閣。星辰繞直廬。諸生起孤賤。天子自吹噓。願以多聞力。論思補帝裾。

款塞來享

前朝夏州守來款塞門西。聖主敷文德。降書付狄鞮。氈裘瞻日月。勞面帶金犀。殿陛閑干羽。邊亭息鼓鼙。永輸量谷馬。不作觸藩羝。聲勢常相倚。今聞定五溪。

德清道中還寄子瞻

秦觀

投曉理竿棹。溪行耳目醒。蟲魚各蕭散。雲日共晶熒。水荇重深翠。烟山疊亂青。路回逢短榜。崖斷點孤翎。叢薄開羅帳。淪漪寫鏡屏。疎籬窺窈窕。支港泛笭箵。遠澱依微見。哀猿斷續聽。夢長天杳杳。人遠樹冥冥。旅思搖風旆。歸期數月冥。何時燃密炬。復聽閣前鈴。

擬郡學試東風解凍

寶歷開新歲。春回斗柄東。漪生天際水。凍解日邊風。浩蕩依蘋起。侵尋帶雪融。江河霜練靜。池沼玉奩空。魚藻雍容裏。雲霄俯仰中。更無舟楫礙。從此百川通。

道中書事

陳與義

臨老傷行役。籃輿歲月奔。客愁無處避。世事不堪論。白道含秋色。青山帶雨痕。壞梁斜鬪水。喬木密藏村。易破還家夢。難招去國魂。一身從白首。隨意答乾坤。

晚晴野望

洞庭微雨後。涼氣入綸巾。水底歸雲亂。蘆叢返照新。遙汀橫薄暮。獨鳥度長津。兵甲無歸日。江湖送老身。悠悠只倚杖。悄悄自傷神。天意蒼茫裏。村醪亦醉人。

秋雨排悶

陸游

今夏久無雨。從秋卻少晴。空濛迷遠望。瀟瑟送寒聲。衣潤香偏著。書蒸蠹欲生。壞簷聞瓦墮。漲水見堤平。溝溢池魚出。天低塞鴈征。螢飛明闇廡。蛙鬧雜疎更。藥醖時須焙。舟閑任自橫。未憂荒楚菊。直恐敗吳秔。夜永燈相守。愁深酒細傾。溪雲會消散。鼓笛賽西城。

過大蓬嶺度繩橋至杜秀才山莊

度笮臨千仞。梯山躡半空。濕雲朝暮雨。陰壑古今風。亭觀參差見。闌干詰曲通。柳空叢篠出。松偃翠蘿蒙。負籠銀釵女。鉏畬鶴髮翁。何由有餘俸。小築此山中。

冬日出遊十韻

吳會寒常薄。冬深略未冰。荒郊觀雉鬪。大澤見魚騰。釣艇頻容借。籃輿漸可乘。有時穿密篠。隨處倚枯藤。金石秦遺刻。衣冠禹舊陵。叢祠祈臘雪。小市試春燈。問路鉏畬叟。爭橋乞供僧。疎狂違俗久。衰疾與年增。干祿雖知恥。懸車愧未能。階官有微俸。醉髮任鬢鬢。

卷八

五言絕

出守桐廬道中

范仲淹

素心愛雲水。此日東南行。笑解塵纓處。滄浪無限清。

滄浪清可愛。白鳥鑑中飛。不信有京洛。風塵化客衣。

夜夜曲

歐陽修

浮雲吐明月。流影玉階陰。千里雖共照。安知夜夜心。

自菩提步月歸廣化寺

春巖瀑泉響。夜久山已寂。明月淨松林。千峯同一色。

晚過水北

寒川消積雪。凍浦暫通流。日暮人歸盡。沙禽上釣舟。

遠山

山色無遠近。看山終日行。峯巒隨處改。行客不知名。

和梅聖俞杏花

誰道梅花早。殘年豈是春。何如豔風日。獨自占芳辰。

和聖俞百花洲

野岸溪幾曲。松蹊穿翠陰。不知芳渚遠。但愛綠荷深。

雨後回文

綠水池光冷。青苔砌色寒。竹深啼鳥亂。庭暗落花殘。

曉霽

司馬光

劉敞

夢覺繁聲絕。林光透隙來。開門驚烏鳥。餘滴墮蒼苔。

題齊安壁

王安石

日淨山如染。風暄草欲薰。梅殘數點雪。麥漲一溪雲。

再題南澗樓

北山雲漠漠。南澗水悠悠。去此非吾願。臨分更上樓。

南浦

南浦隨花去。迴舟路已迷。暗香無覓處。日落畫橋西。

溝港

溝港重重柳。山坡處處梅。小輿穿麥過。狹徑礙桑回。

梅花

牆角數枝梅。凌寒獨自開。遙知不是雪。爲有暗香來。

江上

江水漾西風。江花脫晚紅。離情被橫笛。吹過亂山東。

秣陵道中

經世才難就。田園路欲迷。慙慙將白髮。下馬照青溪。

雜詠

證聖南朝寺。三年到百回。不知牆下路。今日幾荷開。
桃李石城塢。餉田三月時。紫荊常自閉。花發少人知。

蓼嶼

孤嶼紅蓼深。清波照寒影。時有雙鷺鷺。飛來作佳景。

望雲樓

巴山樓之東。秦嶺樓之北。樓上捲簾時。滿樓雲一色。

露香亭

宿露濛曉花。婀娜清香發。隨風入懷袖。累日不消歇。

溪光亭

橫湖決餘波。瀲灩瀉寒溜。日影上高林。清光動牕牖。

遺老齋

久無叩門聲。啄啄問何故。田中有人至。昨夜盈尺雨。

西村

遠近皆僧刹。西村八九家。得魚無賣處。沽酒入蘆花。

客兒亭

翻經人已去。誰爲立幽亭。一望野雲白。半藏山骨青。

文同

蘇轍

郭祥正

翠樾堂

深堂待遊客。老木競留春。花發多臨水。雲開始見人。

夢中得此

縞帶橫秋匣。寒流炯暮堂。風塵如未息。持此奉君王。

詠雪

都城十日雪。庭戶皓已盈。呼兒試輕掃。留伴小牕明。

凡上人名所乘舟曰釣月菴求詩爲賦

昔人釣忘餌。今師釣忘鉤。靜夜江不湍。孤光送歸舟。

春日

落日不可盡。丹林紫谷開。明明遠色裏。歷歷暝鴉回。

出山

山空樵斧響。隔嶺有人家。日落潭照樹。川明風動花。

入山

都迷去時路。策杖烟漫漫。微雨洗春色。諸峯生晚寒。

題友人書後

客子得秋涼。壯懷亦增慨。永念故人遠。三湘渺滄海。

秦觀

傅察

崔鷗

陳與義

曹勛

早行

村雞已報晨。曉月漸無色。行人馬上去。殘燈照空驛。

梅花絕句

陸游

低空銀一鉤。糝野玉三尺。愁絕水邊花。無人問消息。

梅花

春信今年早。江頭昨夜寒。已教清徹骨。更向月中看。

物外雜題

粉蝶臨江渚。朱橋枕市樓。長吟策小蹇。又度一年秋。

柳橋晚眺

小浦聞魚躍。橫林待鶴歸。閒雲不成雨。故傍碧山飛。

雪晴欲出而路澗未通戲作

欲覓溪頭路。春泥不可行。歸來小牕下。袖手看新晴。

西寮

朱子

畚田種胡麻。結草寄林樾。珍重無心人。寒棲弄明月。

野牧園

張孝祥

吳牛三十角。久與牧相忘。忽憶淮南路。春風滿柘岡。

秋晚稻生孫。催科不到門。人閑牛亦樂。隨意過前邨。

春晚

葛天民

向晚一鳩鳴。道人春睡足。無處寫幽懷。巡檐數修竹。

有所思

葉茵

仰天有所思。心遠目苦短。西風驅殘雲。千里月華滿。

閨九

嚴粲

前月登高去。猶嫌菊未黃。秋風不相負。特地再重陽。

沽酒

利登

有錢但沽酒。莫買南山田。勾引催租人。驚散清松烟。

春日

雨過苔猶溼。風來戶半開。閑花忽落盡。啼鳥自飛來。

嶺梅

張道洽

到處皆詩境。隨時有物華。應酬都不暇。一嶺是梅花。

塵外

朱繼芳

塵飛不到處。山色入芒屨。乘興一長吟。回頭已忘句。

江上

俞桂

江頭雲閣雨。柳色與春深。船發春風阻。誰知客子心。

寄江南故人

家鉉翁

曾向錢唐住。聞鶻憶蜀鄉。不知今夕夢。到蜀到錢唐。

溪上

羅公升

往歲貪奇覽。今年遂考槃。門前溪一髮。我作五湖看。

送歸使絕句

梁楚連天闊。江湖接海浮。故人相憶夜。風雨定何州。

七言絕

泛吳松江

王禹偁

葦蓬疎薄漏斜陽。半日孤吟未過江。惟有鷺鷥知我意。時時翹足對船牕。

春居雜興

兩株桃杏映籬斜。粧點商山副使家。何事春風容不得。和鶯吹折數枝花。

尋隱者不遇

魏野

尋真誤入蓬萊島。香風不動松花老。採芝何處未歸來。白雲滿地無人掃。

書孤山隱居壁

林逋

山木未深猿鳥少。此生猶擬別移居。直過天竺溪流上。獨樹爲橋卜結廬。

皇帝閣春帖子詞

宋 祁

望春臺下春先到。獵獵青旗倚漢宮。水自北涯生煖溜。花從東面受和風。

泥溪驛中作嘉陵江自大散關與予相別二十餘程至泥溪借予去。因有是作。

石 介

山驛蕭條酒倦傾。嘉陵相背去無情。臨流不忍輕相別。吟聽潺湲坐到明。

豐樂亭遊春

歐陽修

紅樹青山日欲斜。長郊草色綠無涯。遊人不管春將老。來往庭前踏落花。

田家

綠桑高下映平川。賽罷田神笑語喧。林外鳴鳩春雨歇。屋頭初日杏花繁。

行次壽州寄內

紫金山下水長流。嘗記當年此共遊。今夜南風吹客夢。清淮明月照孤舟。

春日詞

宮壇青柏賽牛回。玉琯東風逗曉來。不待嶺梅傳遠信。翦刀先放綵花開。
試粉東牕待曉迴。共尋春柳傍香臺。不驚樹裏禽初變。共喜釵頭燕已來。
紅霧初開上曉霞。共驚風色變年華。香車遙認春雷響。庭雪先開玉樹花。

鴈

來時砂磧已冰霜。飛過江南木葉黃。水闊天低雲暗澹。朔風吹起自成行。
夏意

蘇舜欽

別院深深夏簟清。石榴開遍透簾明。樹陰滿地日卓午。夢覺流鶯時一聲。
絕句

春陰垂野草青青。時有幽花一樹明。晚泊孤舟古祠下。滿川風雨看潮生。

絕句

劉攽

青苔滿地初晴後。綠樹無人晝夢餘。惟有南風舊相識。徑開門戶又翻書。

閑居

司馬光

故人通貴絕相過。門外真堪置雀羅。我已幽慵僮更懶。雨來春草一番多。

初夏卽事

王安石

石梁茅屋有彎碕。流水濺濺度兩陂。晴日暖風生麥氣。綠陰幽草勝花時。

自定林到西菴

午雞聲不到禪林。柏子烟中靜擁衾。忽憶西巖道人語。杖藜乘興得幽尋。

北山

北山輸綠漲橫陂。直壑回塘灑灑時。細數落花因坐久。緩尋芳草得歸遲。

出郊

川原一片綠交加。深樹冥冥不見花。風日有情無處著。初迴光景到桑麻。

悟真院

野水從橫漱屋除。午牕殘夢鳥相呼。春風日日吹香草。山北山南路欲無。

書湖陰先生壁

茆簷長掃靜無苔。花木成畦手自栽。一水護田將綠繞。兩山排闥送青來。

金陵卽事

水際柴門一半開。小橋分路入青苔。背人照影無窮柳。隔屋吹香併是梅。

和張仲通憶鍾陵

一夢章江已十年。故人重見想皤然。祇應兩岸當時柳。能到春來尙可憐。

鍾山卽事

澗水無聲繞竹流。竹西花草弄春柔。茅簷相對坐終日。一鳥不鳴山更幽。

遊鍾山

兩山松櫟暗朱藤。一水中間勝武陵。午梵隔雲知有寺。夕陽歸去不逢僧。

城北

青青千里亂春袍。宿雨催紅出小桃。迴首北城無限思。日酣川淨野雲高。

次吳氏女子吳氏詩云。西風不入小窗紗。秋氣應憐我憶家。極目江南千里恨。依然和淚看黃花。

南朝九日臺。在孫陵曲街旁。去吾園只數百步。

孫陵西曲岸烏紗。知汝淒涼正憶家。人世豈能無聚散。且逢佳節看黃花。

天童山溪上

溪水清漣樹老蒼。行穿溪樹踏春陽。溪深樹密無人處。惟有幽花渡水香。

惠崇春江曉景

竹外桃花三兩枝。春江水暖鴨先知。蒹葭滿地蘆芽短。正是河豚欲上時。

金山夢中作

江東賈客木綿裘。會散金山月滿樓。夜半潮來風又烈。臥吹簫管到揚州。

澄邁驛通潮閣

倦客愁聞歸路遙。眼明飛閣俯長橋。貪看白鷺橫秋浦。不覺青林沒晚潮。餘生欲老海南村。帝遣巫陽招我魂。杳杳天低鶻沒處。青山一髮是中原。

望海樓晚景

青山斷處塔層層。隔岸人家喚欲應。江上秋風晚來急。爲傳鐘鼓到西興。

唐道人言天目山上俯視雷雨。每大雷電但聞雲中如嬰兒聲。殊不聞雷震也。已外浮名更外身。區區雷電若爲神。山頭只作嬰兒看。無限人間失筭人。

六月二十七日望湖樓醉書

黑雲翻墨未遮山。白雨跳珠亂入船。卷地風來忽吹散。望湖樓下水如天。
放生魚鼈逐人來。無主荷花到處開。水枕能令山俯仰。風船解與月徘徊。

少年時嘗過一村院。見壁上有詩云。夜涼疑有雨。院靜似無僧。不知何人作也。宿黃州禪智寺。僧皆不在。夜半雨作。尚記此詩。故作一絕。

佛燈漸暗。餓鼠出。山雨忽來。修竹鳴。知是何人舊詩句。已應知我此時情。
和孔密州東欄梨花

梨花淡白柳深青。柳絮飛時花滿城。惆悵東欄一株雪。人生看得幾清明。
海棠

東風嫋嫋汎崇光。香霧霏霏月轉廊。只恐夜深花睡去。高燒銀燭照紅粧。
書李世南所畫秋景

野水參差落漲痕。疎林欹倒出霜根。扁舟一棹歸何處。家在江南黃葉村。
飲湖上初晴復雨

水光瀲灩晴方好。山色空濛雨亦奇。欲把西湖比西子。淡粧濃抹總相宜。
垂虹亭

斷雲一葉洞庭颿。玉破鱸魚霜破柑。好作新詩寄桑苧。垂虹秋色滿東南。
訪隱者

米芾

郭祥正

一徑沿厓踏蒼壁。半塢寒雲抱泉石。山翁酒熟不出門。殘花滿地無行迹。
秋意題邢敦夫扇

秦觀

月團新碾淪花瓷。飲罷呼兒課楚詞。風定小軒無落葉。青蟲相對吐秋絲。
納涼

攜杖來追柳外涼。畫橋南畔倚胡牀。月明船笛參差起。風定池蓮自在香。

邗溝

霜落邗溝積水清。寒星無數傍船明。菰蒲深處疑無地。忽有人家笑語聲。

赴廣陵道中

晁補之

急鼓鼙下泗州。卻瞻金塔在中流。帆開朝日初生處。船轉春山欲盡頭。

戲留次哀三十三弟

晁沖之

白下春泥尙未乾。汴流更待小潺湲。不知汝定成行不。寒食今無數日間。

春日

陰陰溪曲綠交加。小雨翻萍上淺沙。鶯鳴不知春去盡。爭隨流水趁桃花。

絕句

張耒

亭亭畫舸繫春潭。直待行人酒半酣。不管烟波與風雨。載將離恨過江南。

小放歌行

陳師道

春風永巷閉娉婷。長使青樓誤得名。不惜捲簾通一顧。怕君着眼未分明。

二月十五日朝拜建隆橋上偶作

鄒浩

單衣迎犯曉風清。斗柄回南月尚明。柳密行人看不見。輪蹄相屬但聞聲。

代葛亞卿作

韓駒

君住江濱起畫樓。妾居海角送潮頭。潮中有妾相思淚。流到樓前更不流。

次韻林冲和筠莊

李彌遜

疊疊重重兩岸山。鉤連秀色上琅玕。孤亭四壁面烟雨。人與白鷗分暮寒。

清明

陳與義

卷地風拋市井聲。病扶危坐了清明。一簾晚日看收盡。楊柳微風百媚生。

春日

朝來庭樹有鳴禽。紅綠扶春上遠林。忽有好詩生眼底。安排句法已難尋。

和翁秘監彥深喜

程俱

朝來喜氣溢層霄。側聽封人共祝堯。密雪正應歌九扈。疾雷先已破三苗。時初殄寇。

卽看新綠歸千畝。還見陳紅積九年。便覺雨暘如有意。不須花草苦爭妍。

春晚

朱松

梅子生仁柳絮催。春風塵迹只蒼苔。繁華一夢年年事。長是初鶯爲喚回。

客路歸來芳節闌。杖藜隨處小盤桓。危紅數點藏深綠。須作春風爛漫看。
延平道中

朱棹

一溪春漲午晴初。日透波光綠浸裾。卻憶孤山山下路。石橋清澈看叉魚。
入直召對選德殿賜茶而退

周必大

綠槐夾道集昏鴉。敕使傳宣坐賜茶。歸到玉堂清不寐。月鉤初上紫薇花。
緩帶軒獨坐

范成大

午日烘開豆蔻苞。簷塵飛動雀爭巢。蒙蒙困眼無安處。閑送爐烟到竹梢。
題畫卷

鑿落秋水石。明高楓老柳兩灘橫。君看疊巘雲容變。又有中宵雨意生。
題開元天寶遺事

御前羯鼓透春空。笑覺花奴手未工。一曲打開紅杏蕊。須知天子是天公。
謝蠻舞袖貴妃絃。秦國如花號國妍。不賞纏頭三百萬。阿姨何處費金錢。
橫塘

南浦春來綠一川。石橋朱塔兩依然。年年送客橫塘路。細雨垂楊繫畫船。
次韻周輔道中

陸游

山靈喜我馬蹄聲。正用此時秋雨晴。日淡風斜江上路。蘆花也似柳花輕。

花時遍遊諸家園

看花南陌復東阡。曉露初乾日正妍。走馬碧雞坊裏去。市人喚作海棠顛。
爲愛名花抵死狂。只愁風日損紅芳。綠章夜奏通明殿。乞借春陰護海棠。
絲絲紅萼弄春柔。不似疎梅只慣愁。常恐夜寒花索寞。錦茵銀燭按涼州。
飛花盡逐五更風。不照先生社酒中。輸與新來雙燕子。銜泥猶得帶殘紅。今年二月二日社。而海棠已過。

楚城

江上荒城猿鳥悲。隔江便是屈原祠。一千五百年間事。只有灘聲似舊時。

夜讀呂化光文章拋盡愛功名之句戲作

玉關西望氣橫秋。肯信功名不自由。卻是文章差得力。至今知有呂衡州。

梨花

開向春殘不恨遲。綠楊窄地最相宜。征西幕府煎茶地。一幅邊鸞畫折枝。
宣司靜鎮堂屏上。有邊鸞梨花。粉淡香清自一家。未容桃李占年華。常思南鄭清明路。醉裏迎風雪一杈。

春遊絕句

一百五十春郊行。三十六溪春水生。千秋觀裏逢急雨。射的峯前看晚晴。
自秦望山而北。合三十六溪水。爲若耶溪。

舍北望水鄉風物戲作絕句

西風沙際矯輕鷗。落日橋邊繫釣舟。乞與畫工團扇本。青林紅樹一川秋。

三峽歌

十二巫山見九峯。船頭彩翠滿秋空。朝雲暮雨渾虛語。一夜猿啼明月中。我遊南賓春莫時。蜀船曾繫挂猿枝。雲迷江岸屈原塔。花落空山夏禹祠。

題搨本姜楚公鷹

弓面霜寒斗力增。坐思鐵馬蹴河冰。海東俊鶻何由得。空看綿州舊畫鷹。

秋思

桑竹成陰不見門。牛羊分路各歸村。前山雨過雲無跡。別浦潮回岸有痕。雪後晚晴四山皆青。惟東山全白。賦最愛東山晴後雪。絕句

楊萬里

只知逐勝忽忘寒。小立春風夕照間。最愛東山晴後雪。軟紅光裏湧銀山。

遊定林寺卽荆公讀書處

鍾山已在萬山深。更過鍾山入定林。穿盡松杉行盡石。一庵猶隔白雲岑。

水口行舟

朱子

昨夜扁舟雨一簑。滿江風浪夜如何。今朝試卷孤蓬看。依舊青山綠樹多。鬱鬱層巒夾岸青。春山綠水去無聲。烟波一棹知何許。鷓鴣兩山相對鳴。

喜雨呈安國

張栻

慙知雨意未渠已。一夜簷聲到枕間。
曉上高樓望雲氣。蟄龍千丈起西山。
從呂揚州覓芍藥栽

揚州風物故依然。夢想他時楚水邊。
乞與靈根歸自種。梢頭繭栗看新年。
初夏偶書

江潭四月熟梅天。頃刻陰晴遞變遷。
掃地焚香清晝永。一牕修竹正森然。
遷入新居後客至偶成

方壺客去偃雲牀。槐柳陰陰日自長。
睡起不知天早晚。問人山頂是斜陽。
賞春

滿酌黃封都市酒。斜簪纓帶御園花。
半酣更乞跳珠水。獨對風爐自煮茶。
江村晚眺

江頭落日照平沙。潮退漁舸閣岸斜。
白鳥一雙臨水立。見人驚起入蘆花。
蚤作

星光欲沒曉光連。霞暈紅浮一角天。
乾盡小園花上露。日痕恰恰到牕前。
宮詞

梨花風動玉蘭香。春色沈沈鎖建章。
惟有落紅官不禁。儘教飛舞出宮牆。

武夷山中

汪莘

周文璞

戴復古

黃大受

武衍

謝枋得

十年無夢得還家。獨立青峯野水涯。天地寂寥山雨歇。幾生修得到梅花。

虹口法院移交
滕公博案內圖書

上海图书馆藏书



A541 212 0004 0694B

Hit 2000

編主五雲王

庫文有萬

種千一集一第

裁別詩宋

選等星景張

路山寶海上
館書印務商 者刷印兼行發

埠各及海上
館書印務商 所行發

版初月四年九十國民華中

The Complete Library

Edited by

Y. W. WONG

SUNG SHIH PIEH TSAI

Selected by

CHANG CHING SING AND OTHERS

THE COMMERCIAL PRESS, LTD.

Shanghai, China

1930

